

深澤縣志

賀培新署





## 深澤縣志序

深澤當滹沱潞水南北之會界安東晉定之交四通八達邑小民貧咸豐十年予移刺中山時以嘆喏二國和議未成京師戒嚴東豫捻匪竄入畿南郡縣土寇饑民乘間蠶起深澤有岌岌乎不可保之勢予亟與縣令教佐集紳董練勇丁晝夜巡防獲匪立予駢誅聲勢聯絡外侮聞風遠遁自夏徂冬躬親其事而能識政體不辭勞瘁者邑之士惟王子肇晉爲最越一年歲獲中稔閭閻安堵王子以續脩縣志乞爲校正予按縣志創始於康熙年許君來音釐正於乾隆年王君植來音稱循吏宰縣時盜賊橫行民不安枕嘗曰內寇不靖何緝外寇嚴鄉民守禦而盜遂屏迹王君植肇晉之祖爲羅定州牧循良之譽徧於東粵其條陳三事曰足用於國不如藏富於民曰僻鄉下邑絃誦相聞又曰嚴保甲凡奸匪例當

連坐者按律必懲嗚呼使有牧民之責者皆以許王二君之言爲則小邑窮鄉之百姓豈有饑寒盜賊之憂哉夫志一邑之史也不惟其文而惟其事不惟其事而惟其事之足以徵文獻而垂法戒考訂百餘年後其間人事廢興見聞就湮無能稱說者秉筆之士或文采不足以識舊典學問不能以窺述作使我

國家深仁厚澤之遺賢令尹禦災安民之道職官輿地沿革變置之方人才學校文章之盛衰不備其始終本末無以俟輶軒之采而來者無所考焉即有求治若渴之衷而於治亂之原委地方設施之順逆舊典旣無可徵信徒憑耳目所覩記者以懸揣而奉行故事其奚能有裨於斯民乎志之所繫豈淺鮮哉予深嘉王子之能繼前徽而識政體也而爰爲之序時

同治改元春正月

誥授中憲大夫賞換花翎隨帶加五級即補知府定州直隸州知州  
吳郡汪鳴和序

# 序

士君子生當斯世宜潛心古訓使其言可爲士民矜式其行可爲閭里楷模自足端習尙而挽頽風若不克自勵而徒汲汲焉記載一邑之故事抑未矣雖然邑之有志所以宣揚德化寄情褒貶而使斯人有所觀感也深澤縣志創始於許仁峯大令後閱七十餘載而先高伯祖慇思公增損考訂蔚爲巨觀迄今又百餘年矣余嘗致書先兄琴航公欲與網羅採輯上續先型而琴航公馳驅閩省卒致盡瘁以歿嗚呼時歷百年人物就湮及今不修尙何待乎庚申春邑宰暨兩學博僉以纂修之事委任于余夫志猶史也體製以謹嚴爲上次則考核貴詳明採訪宜周密之者一有不備不敢言續又奚足言志余何敢以此自任哉然此百餘年中

國家之深仁厚澤所以覃敷斯邑者賢令尹之設施教化所以栽培

斯邑者以及人才之奮興建置之沿革風俗之盛衰河流之遷徙使不詳爲記載俾就湮沒不獨無以昭示成茲亦且溯先型而慙然滋愧此又余所不能辭其責者也用是不揣謏陋採而集之然不敢自是時折衷於邑宰學博諸公凡前志之立意精嚴者存之無關體要者去之篇幅冗長者節之人物未備者補之後事宜紀者續之酌古準今互相參考閱兩載而葺事使後之人觀忠孝節義之風爲之奮然興觀世事變遷之跡爲之惕然懼前以紹先型于未墜後以資同志之採擇未必無小補於斯邑也至若考核未精搜羅未至斟酌未盡善此則余之所不能免願俟後之君子匡厥不逮云

時咸豐十有一年歲次辛酉孟秋邑人王肇晉謹序

凡例

一深澤縣前明無志自康熙乙卯邑令許來音始搜葺于鄉紳張靖之家得前教諭張勸所輯稿復較閱郡志祁志與邑紳士參互考訂與其事者邑紳王鏞袁斌孝廉張篤之明經王鏞茂才張鉉是爲康熙年志

一乾隆初年前羅定州牧王植取舊志增損釐正復增入編年一篇以爲全書提綱挈領而併災祥于其內細目則增河防倉儲兵防佚事四篇是爲乾隆年志

一編年一篇舊志皆搜採全史加以 聖朝典要大書分列其餘朝廷大政不僅爲一邑設者概不增入今自乾隆五十七年以後按冊編入其無從查考者不敢濫載以誌謹嚴

一建置志內舊志于學校壇廟特附配享從祀名宦鄉賢忠孝節烈各姓名位次今均移之典禮志內以昭尊敬

一與禮志舊志僅載大略今考部頒各儀制並會典諸書詳細開載凡秩祀諸神名姓暨歷朝封號亦博稽羣書登之冊內其不在祀典者均附見于建置志內以示區別

一食貨志內舊志將歷年奉裁之項諸款細書今惟將總數附列于後餘從刪削

一選舉志內舊志以科目爲主而明經分恩拔副歲其捐貢例監椽吏則由庠援例由



吏除職者始載餘皆從省今悉仍其舊

一宦蹟人物已見正史者若元之尙文劉仲洙明之王源均略存梗概以爲鄉邦矜式其未入正史者則詳細叙列以備他年史官採擇且于傳後載明某人所撰庶免鑿空杜撰黨私阿好之譏

一舊志將尙義壽考均列之餘志今移之人物志內以昭畫一

一舊志藝文志內所載詩賦甚夥今惟存其有關事蹟者餘皆從刪

一藝文事蹟互相表裏故不關形勝不關政蹟者不與若夫事不盡雅馴人不盡名賢一端可傳不忍湮沒者別爲佚事于書末略做說苑世說遺意蓋邑乘雖小輜軒所資傳信傳疑不敢不慎後之君子必能諒之

深澤縣志目錄

仁和許 忠葵生

海豐張衍壽子靜

三韓續 曾紹庭

景州劉汝霖益之

全參定

天津孫慶瀾雲翔

常州章岳鎮仲甘

邑人王肇晉榕泉修輯

第一卷

編年志

邑事

第二卷

輿地志

星野

河防

沿革

疆域

山川

古蹟

十景附

第三卷

建置志

城池

公署 公所附 恤政附 壇廟 生祠附 寺觀附 觀社學

倉廩

坊表

閭里

橋梁

鋪遞 墩堠附 兵防附

第四卷

典禮志

祀典 上

祀典 下

學規

禮制

歲時

風俗

俗禮

第五卷

食貨志

丁匠

田賦

留支

養廉

倉儲

遞馬

雜稅

鹽課

物產

第六卷

職官志

縣尹 縣丞 主簿 典史

教諭 訓導 武弁 名宦

官蹟

第七卷

選舉志

辟薦 進士 舉人 貢生

貢監 封贈 恩蔭 武職

武舉

第八卷

人物志

鄉賢 仕進 忠 孝

尚義 拾金不昧附 壽考 節烈

第九卷

藝文志

各文

第十卷

藝文志

詩

佚事附

深澤縣志卷之一

編年志

史有分門析類亦有年經月緯蓋所以貫初終而具事跡也深澤自漢魏以還往往蹂躪於戎馬攘據于寇霸其軼事皆散見班馬以後之書迨元明之際土滿人稀所爲土著者類由洪洞縣小興州僑寓於斯

國朝生聚教訓二百餘年而後生齒之繁人文之盛超出前古守土者其務益加培畜詎可習而忘之哉今先列編年一志以爲全書提綱挈領並附災祥於內庶事有統系易於觀覽焉志編年

邑事

漢高帝八年壬寅十月癸丑封趙將夜爲深澤侯此深澤見於籍之始也將夜亦作將夕趙將也漢三年降屬淮陰侯定趙齊楚以擊平城侯七百戶是爲齊侯其元年高帝八年也見史記

按漢書漢有兩深澤隸涿郡者爲南深澤屬幽州隸中山國者爲深澤屬冀州而史記索隱注深澤侯下云屬中山則是將夜所封乃深澤非南深澤也今深澤即漢之南深澤而舊志以爲將夜封爵姑存疑可也

更始二年甲申春正月光武帝徇河北由深澤度滹沱

世祖本紀光武以王郎新盛北徇薊故廣陽王子劉接起兵應郎於是趣駕南轅至滹沱河無船適遇冰合得過又王霸傳霸從光武擊破王尋王邑於昆陽及王郎起光武在薊郎移檄購光武光武南馳至滹沱河候吏白河水流漸無船不可渡官屬大懼光武令霸往視霸恐驚衆還詭曰冰堅可渡光武笑曰候吏果妄語也遂前比至河冰果合乃令霸護度未畢數騎而水解注云滹沱經定州深澤縣東南光武度處今俗猶謂之危渡口○按光武在更始中爲大司馬數經臨深澤今邑北之留屯邑南之息馬水凍諸鄉皆因事爲名父老猶傳之

魏咸熙二年乙酉夏四月南深澤言甘露降

見魏志

隋大業十二年丙子竇建德襲深澤取之

初上谷賊王須拔自號漫天王以兵略幽州戰死其下魏刀兒號歷山飛壁深澤衆十萬建德以計襲取之並有其地次年遂稱王見新唐書竇建德傳

唐開元十八年庚午以劉遂昌爲深澤令

是時官制令一人丞一人主簿一人尉二人唐代尹斯土者在祁州志僅遂昌一人

復於大忍寺唐碑內得其姓名時丞爲齊賢主簿爲樊璆尉爲張懷張仲良

會昌三年癸亥深澤令家狗生角

見新唐書五行志志引京房傳曰執政失將害之應又曰君子危陷則狗生角

光化三年庚申朱全忠將氏叔琮下深澤

侍中檢校太尉王處存卒子郃嗣爲留後進太保是年朱全忠使張存敬攻幽州道  
祁溝關郃方與劉守光厚乃畀叔處直兵擾其尾令騎將甄瓊章次義豐而存敬游  
奕騎已至且戰且引十餘里執瓊章而氏叔琮下深澤執大將馬少安圍祁州屠之  
處直大敗見新唐書王處存傳

宋景德<sub>某</sub>年賜李春進士出身

深澤進士唐以前不可考宋進士四人景德則李春熙甯則張建元祐則田矩紹興  
則王麟

元祐二年丁卯深澤建廟學

熙甯中縣省入鼓城元豐七年復墊於水廟學傾廢至是知縣許安石始卜地創建  
田矩爲之記

元符元年戊寅九月深澤野蠶成繭織紵成萬疋見宋史五行志○按宋志載元祐六



年閏八月定州七縣野蠶成繭是年復見於深澤則深澤固蠶桑之土也治斯土者宜因地利道之

金興定三年蒙古張柔掠深澤

柔故金將興定二年蒙古獲其二親柔不得已降蒙古至是與金將武仙戰於滿城大敗之遂圍中山府南掠鼓城深澤甯晉諸縣見金史

元中統<sup>某</sup>年賜晏執柯進士出身

按舊志元進士四人在中統者爲晏執柯在至元者爲尙文張敏王晉考尙文傳乃由辟薦任用未嘗由進士也於此知舊志不盡核實

至元七年庚午擢尙文爲右直侍儀使

事詳本傳

明洪武二年己酉深澤建城隍廟

在縣治西

四年辛亥深澤修復公署

元順帝二十一年義兵千戶毛胡盧據守易州深澤無人守禦縣復廢至是知縣閻毅始修復

十三年庚申頒臥碑於深澤學宮

頒示榜文於天下令刊石於明倫堂左謂之臥碑深澤遵奉如制

十七年甲子深澤建常平倉

在吏廨東知縣姚思誠創建

成化十二年丙申深澤木異

趙八莊榆幹中枯槩忽生竅出水病者飲之輒愈凡禱者承以器則流去則止如是  
逾年而息

正德三年戊辰深澤豕異

是年民間豕生一子色白無毛一目出頂上鼻如象

六年辛未十二月賊劉六劉七寇縣陷之

時有烈女張氏烈婦高氏死節事詳節烈

九年甲戌賜王經進士出身

唐臯榜

嘉靖九年庚寅深澤建啟聖祠

時釐正祀典文廟易像爲木主稱先師先賢另建啟聖祠祀聖父叔梁公前此顏路

曾哲孔鯉俱祀兩廡至是與孟子父孟孫氏配享祀內又以程珦朱松蔡元定等從祀深澤遵奉如制

十一年壬辰賜劉素進士出身

林大欽榜

隆慶五年辛未賜王度進士出身

張元忭榜

萬曆八年庚辰賜張立愛進士出身

張懋修榜

三十二年甲辰深澤大水發廩賑恤

用撫按臣之請也○按深澤屢墊於溇潰此後如三十五年天啟六年壞民舍淹禾稼皆其災之大者不能盡書也

四十二年甲寅裁深澤縣丞

按主簿嘉靖前已奉裁未詳其年

天啟元年辛酉南留屯民劉計昌妻一乳二男

時計昌年十八妻閻氏

深澤縣署見怪

是年官署時見鬼怪形或若犬狀數年不止縣令程可登莅任政事修舉怪自己  
崇禎十年丁丑賜王正中進士出身

劉同升榜

十六年癸未春三月十二日

大清兵至城陷知縣趙料訓導曾可毅典史周射斗死之

事詳職官○時有宋愈亨及妻媳死節事詳節烈

十七年甲申三月深澤大風陰霾

是月二十日辰時風行空際黑沙蔽天陰霾至午日黯無光是月流賊李自成陷京  
師

國朝

順治元年甲申深澤官制知縣一人典史一人教諭訓導各一人

仍明舊也明初縣學有訓導二人後裁其一

九年壬辰頒臥碑於深澤學宮

凡八條恭鐫臥石於明倫堂東南向條目詳學校

十一年甲午夏六月深澤水災

十年六月潞河水溢趙八莊堤決平地水深丈餘壞民禾稼是歲滹沱復潰禾稼淹沒○按是時締造方新庶政惟和而河伯頻年爲患見河防之急雖在盛世人事不可不修也

十六年己亥裁深澤儒學訓導

後於康熙四年復設

命學臣科歲併爲一考

後於康熙十三年復科歲兩考

併定州衛於深澤

縣之北鄉張家莊段家莊東鄉大堡馬壘故城南而中羊孝敬等鄉皆衛屯也至是併入深澤計人丁五百二十有九

康熙四年乙巳裁深澤儒學教諭

後於康熙十五年復設

七年戊申深澤水災

恩詔蠲賑

濶沱瀆河並溢淹沒沒禾稼被水各鄉廬舍傾倒殆盡直隸巡撫甘題請蠲賑

八年己酉

詔賜老民六十以上者布一疋米六斗貧戶皆報名賑資

十年辛亥免深澤皮賦

深澤歲賦狐皮九十二張本邑不出覓之他境胥吏因緣爲奸益滋煩擾至是知縣許來音詳請具題部議照賦役全書內價值徵解民困以蘇

廣深澤學額

順治十六年定例童生入學六名是年知縣許來音詳請援例廣額文武入學各八名另撥入府學一名

十二年癸丑夏六月深澤龍見

是日風雨大作馬舖村民杜金旺家龍起於屋破壁截梁而去

十四年乙卯秋八月故羅村民司允中妻一乳三男

是月二十六日所生也允中妻邸氏

十八年己未夏六月頒

上諭十六條於州縣

先是各縣設木鐸老人每朔望黎明巡行衢巷警於衆曰孝順父母尊敬長上各安生理勿作非爲蓋明舊也是年廣爲十六條詳典禮志

二十四年乙丑頒

御書萬世師表匾額於學官

前歲甲子

駕幸闕里

御書萬世師表四字懸大成殿是歲以四字頒行天下深澤遵奉恭懸 文廟大成殿

二十六年丁卯

恩詔蠲免錢糧

直隸順永保河四府及四川貴州兩省錢糧一同蠲免

二十九年庚午

命文武官員軍民人等經過 文廟下馬

深澤遵奉立下馬碑於櫺星門外

三十三年甲戌

恩詔蠲免錢糧

順永保河均免

三十五年丙子

恩詔蠲免錢糧

順永保河四府田糧丁課俱行蠲免

三十六年丁丑

詔積穀

是年歲大有

詔積穀備賑於是常平之政益修社倉之法大行

四十一年壬午頒

御製訓飭士子文

頒於學官以時講解以端士習文詳學校

四十八年己丑

詔賜老民八十以上每人絹一疋綿一斤米一石肉十斤九十倍之

春三月

賜李率先進士出身



趙熊詔榜

五十一年壬辰以宋儒朱熹升祔十哲之次

旋又以宋儒范仲淹從祀深澤皆遵奉置主如制

五十二年癸巳

恩詔蠲免錢糧嗣後滋生人丁永不加賦

恭值

聖壽六十歲特詔以康熙五十年編審丁口數定爲常額自後續生人丁但造盛世滋生戶口冊報部查核永不加賦計深澤是年丁額共二萬二千四百三十有五

五十四年乙未

命各鄉立義學

是歲

駕幸水淀見村莊誦讀尙少諭直隸巡撫立學延師教之深澤遵奉如制

五十九年庚子

命武職得入 文廟一體行禮

先是止許三品以上武員入廟陪祭至是大小員弁俱得隨班行禮深澤有小章村

駐防千總一員遵奉如制

六十年辛丑春三月

賜王植進士出身

鄧鍾岳榜

雍正元年癸卯追封先師孔子五代王爵

改啟聖祠爲崇聖祠封木金父公爲肇聖王祈父公爲裕聖王防叔公爲詒聖王伯夏公爲昌聖王叔梁公爲啟聖王深澤遵奉如制

命丁銀均攤地糧之內

每銀一兩均攤丁銀二錢七厘零自次年爲始

二年甲辰深澤建忠義孝弟祠節孝祠

建縣治東春秋致祭

三月

賜王械進士出身

陳德華榜

命舉老農給冠帶榮身

漢澤縣志  
命各州縣歲舉勤勞儉樸老農一人給八品冠帶榮身以示鼓勵旋又命三年一舉  
核實力田守分農民濫舉者治其罪

定先賢先儒從祀名位

廷臣集議復祀者六人蘧瑗林放顏何秦冉漢鄭康成晉范甯增祀者二十人縣廩  
牧皮樂正子公都子萬章公孫丑蜀漢諸葛亮宋尹焞魏了翁黃幹陳淳何基王柏  
元趙復金履祥許謙陳澔明羅欽順蔡清 國朝陸隴其增入崇聖祠者一人宋張  
載父迪而宋儒周程張邵朱六子俱稱先賢深澤奉行如制

三年乙巳再廣深澤學額

先是康熙五十四年直隸巡撫趙宏燮奏請廣額深澤由八名廣爲十名至是小學  
改爲中學入學十五名武童亦由八名廣至十二名

追封關聖帝君三代公爵

曾祖爲光昭公祖爲裕昌公父爲成忠公建後殿春秋致祭深澤遵奉如制

四年丙午頒

御書生民未有匾額於學宮

恭懸 文廟大成殿

命 先師孔子聖誕官民人等致齋一日禁止屠宰闕里志八月二十七日爲生辰二月十八日爲忌日

五年丁未建先農壇每歲仲春行耕藉田禮

建壇城東詳典禮志

春三月

賜宋鏞進士出身

彭啟豐榜

六年戊申

命直省拔貢六年舉行一次

深澤貢一人王允謙以知縣即用

七年己酉

詔免深澤錢糧三千四百兩有奇

此畿輔殊 恩也每額徵銀一兩內蠲免一錢七分

八年庚戌春三月

賜宋鋒進士出身

周樹榜

九年辛亥

詔免深澤錢糧三千兩有奇

命設約正值月

詳典禮志

十一年癸丑春三月

賜王瑩中進士出身

陳倌榜

十二年甲寅改深澤隸定州

先是改定州爲直隸州隸以曲陽新樂至是直隸總督李衛以各州多改直隸州正定府僅存十縣題請新樂仍歸正定改深澤與曲陽爲定州屬

乾隆元年丙辰大赦

除年十惡大罪謀殺故殺強盜不赦外其餘死罪以下悉赦之

二年丁巳頒

御書與天地參匾額於學宮

恭懸 文廟大成殿

三年戊午深澤水災

詔賜賑恤

澧河水溢田禾廬舍被淹者五十餘鄉民飢奉文賑恤急賑者一月溥賑者三月次年春又加賑一月

四年己未春修澧河隄岸

發帑銀三千六百兩有奇事詳河防

五年庚申春濬木道溝官道溝水道

按附近村莊分段撥夫事詳河防

六年辛酉

命府州縣行雩祭禮

用御史徐以升之請也事詳典禮志

八年癸亥夏六月深澤熱災

是年立夏後三月不雨亢旱熱甚時有焦木氣觸人即斃有知其症者刺舌下腫核出血塗以炮藥即愈

十年乙丑

賜陳天章進士出身

錢惟誠榜

十四年己巳分別旌表節婦之例

舉報節婦分別節烈奇特者照例建坊旌表尋常守節年例相符者刊名節孝坊不

必概予建坊

十七年壬申深澤建義倉

事詳建置

二十年乙亥冬十月大興村民蘇勇妻宋氏北留屯村民劉邦林妻閻氏俱一乳三男

二十一年丙子創建新街於北城

時知縣吳國棟因北城空闊乃創開新街於北極臺前邑人王棫爲之記今廢以上

舊志以下續纂

五十七年壬子深澤旱

恩詔緩征

深澤八十二村新舊錢糧倉穀均緩至明年麥收後征收

五十九年甲寅深澤大水

詔賜賑恤

漳沱澧河並溢民飢奉文賑恤共用米三千四百石有奇銀二千五百七十三兩有奇

嘉慶元年丙辰大赦

與乾隆元年同

頒

御書聖集大成匾額於學宮

恭懸 文廟大成殿

詔普免錢糧

先是乾隆十年三十五年四十二年五十五年共普免天下錢糧四次至是再行蠲

免深澤奉行如制

六年辛酉深澤水災

詔賜賑恤

六月澧河水溢南趨嗣漳沱又溢折而北田禾廬舍漂沒無算奉文賑恤共用米一



百二十九石有奇銀一千八百兩有奇

十一年丙寅

恩赦減等

除情重不赦外餘減一等

十二年丁卯春三月深澤大風霾

十七年辛未

命以王模入祀鄉賢祠

舉人王翁康天培等以王模賦質深醇居家孝友合詞呈請經直隸總督溫承惠題

請

命準入祠

二十一年丙子重捐義穀

共一千六石九斗一升分置各鄉義倉

二十二年丁丑深澤旱

詔賜賑恤

共用米一千石

二十四年己卯冬十二月深澤大雪

二十五年庚辰

詔免積欠錢糧

是歲蠲免天下積欠錢糧深澤免一萬一千二百兩有奇

道光元年辛巳大赦

與嘉慶元年同

秋七月深澤大疫

六月間天氣驟冷毒霧蒸人七月疫氣流行死者枕藉有知其症者用針刺肘彎及膝後出血即愈至九月間始少殺云

二年壬午頒

御書聖協時中匾額於學宮

恭懸 文廟大成殿

命以原任禮部尙書湯斌從祀廟廡

後又以唐臣陸贄宋臣謝良佐文天祥明臣呂坤黃道周劉宗周孫奇逢均從祀兩廡深澤均奉行如制

秋七月深澤水災

詔賜賑恤

漳沱水溢民飢奉文賑恤共用米一千八百六十一石有奇銀一千七百九十八兩有奇

三年癸未深澤水災

詔賜賑恤

漳沱瀆河並溢民飢奉文賑恤共用米六千二百二十六石

五年乙酉深澤旱蝗

六年丙戌重捐義穀

共五百十三石七斗分置各鄉義倉詳食貨志

夏五月深澤龍見

某日晡時風雨大作龍從東起入 文廟大成殿搜柱木一片破壁穿梁而去

十年庚寅夏四月深澤地震

十四年甲午深澤水災

恩詔緩征

緩河疇等十村積欠錢糧

十五年乙未

詔免深澤錢糧一千三百兩有奇

十九年己亥夏五月大雨雹烈風拔木

傷人無數西內堡村民被傷死者七人

二十五年乙巳

詔免深澤錢糧一千七百兩有奇

三十年庚戌重修 文廟告成

詳建置志

命以王植入祀鄉賢祠

舉人李廷俊貢生劉印川等以王植行止端方著作宏富合詞呈請經直隸總督訥

爾經額題請

命準入祠

咸豐元年辛亥大赦

與道光元年同

頌

御書德濟疇載匾額於學宮

恭懸 文廟大成殿

春三月

命以宋臣李綱從祀廟廡

後又以公孫僑公明儀宋臣韓琦陸秀夫明臣曹端從祀兩廡以孟皮配享崇聖祠  
深澤均奉行如制

三年癸丑

命關聖帝君升入中祀

夏六月深澤水災

恩詔緩征

緩西內堡等村錢糧七百兩有奇

秋七月深澤團練鄉勇

先是粵匪渡河圍懷慶奉

旨各州縣團練知縣楊挺督同紳士募勇訓練後賊由洪洞竄入直境臨洛關數州縣

相繼失守警報愈急至九月初六日晉州陷初七日賊東竄深州是時土匪四起民心惶惶深澤戒備愈嚴拿獲長髮賊二名就地正法居民賴以安堵云

五年乙卯深澤霖雨傷稼

秋七月追封關聖帝君三代王爵

曾祖光昭公爲光昭王祖裕昌公爲裕昌王父成忠公爲成忠王春秋在後殿致祭深澤奉行如制

冬十二月

恩赦減等

六年丙辰

命文昌帝君升入中祀

七年丁巳

命加關聖帝君封號

先是加封忠義神武靈佑仁勇威顯等字嗣又加封護國保民等字至是又加封精誠綏靖等字深澤遵奉如制

大旱

恩詔緩征

自六年八月不雨至是年六月微雨緩征西內堡三十一村錢糧二千九百兩有奇命行使鈔票大錢

因國用不足經部議準以實銀四成鈔票三成大錢三成搭收搭放尋改爲銀七票三征收嗣又改爲銀九鈔一深澤皆奉行如制

八年戊午深澤旱

詔緩方元等村積欠錢糧

是年五月飛蝗入境令民捕捉始盡至六月蝻子復生秋又亢旱知縣許忠稟請緩征方元等八十五村歷年積欠錢糧

詔贈王肇謙光錄寺卿

事詳人物志

十年庚申

賜畢棠進士出身

鍾駿聲榜

九月深澤團練鄉勇

衡水土匪聚衆滋擾九月二十三日其黨竄至安平之角邱村二十六日知縣許忠帶勇赴鐵干村防堵二十九日復同正定府知府徐鏞晉州知州朱寶林赴角邱勦捕賊聞風遁






深澤縣志卷之二

輿地志

郡縣之不可復爲封建也久矣深澤自漢以來有是縣建置沿革代雖不同疆域猶可考也滹沱南環潏水北繞每漲潦沮洳幾如水國焉縣所由名或有取爾乎夫以彈丸界邠東安極晉定之交絕長補短不能五十里然縣無大小令視古諸候輿地不析何以寄厥專城也畢命日申畫郊圻慎固封守爲括其星分按其川渠正其疆界治斯邑者其亦守在四鄰乎志輿地




胃宿



昂宿



天街



畢宿

附耳

其域冀其星昂畢

晉天文志西方七宿內胃三星天之厨藏主倉廩五穀府也昴七星天之耳也主西方主獄事又爲旄頭胡星也昴畢間爲天街天子出旄頭罕畢以先驅此其義也黃道之所經也畢八星主邊兵主弋獵其大星曰天高一曰邊將主四夷之尉也附耳一星在畢下主聽得失伺僭邪察不祥月入畢多雨

按晉志分野自胃七度至畢十一度爲大梁於辰在酉趙之分野而漢書地理志云趙地昴畢之分野趙分晉得趙國北有信都真定常山又得涿郡之高陽鄭州鄉東有廣平鉅鹿清河河間又得渤海之東平舒中邑文安束州成平章武河以北也南至浮水繁陽內黃斥邱西有太原定襄雲中五原上黨皆趙分也則深澤當屬趙之東北境無疑晉志又云常山郡入昴五度中山國入昴八度安平國入畢四度今考晉常山中山安平各統八縣與今廣狹異制而深澤是時與安平饒陽安國共四縣屬博陵郡舊志謂深澤與安平接壤當在畢四度蓋以今之安平縣當晉之安平國且中山入昴八度而安平已入畢四度則星之度豈若是狹乎夫分野之說前人多所疑議且天道遠人道邇君子盡人無斤斤行度之間可也

沿革

唐

冀州地

虞

并州地

夏

冀州地

商

冀州地

周

并州地

春秋

晉地

戰國

趙地

秦

上谷郡地

漢

南深澤 隸涿郡

後漢

南深澤 隸安平國

魏 無考

晉

南深澤 隸博陵國

元魏

深澤縣 始省南字  
名深澤縣 隸博陵郡

北齊

縣廢

後周

縣廢

隋

深澤縣開皇六年復初隸定州大業三年改定州為博陵郡隸博陵大業九年改博陵為

高陽郡隸高陽

唐

深澤縣 初隸定州天寶元載改定州為博陵郡隸博陵乾元元年復改博陵郡為定州隸定州景福二年始置祁州隸祁州

梁 唐 晉 漢 周

深澤縣 皆隸祁州

宋

深澤縣熙寧六年併入鼓城元祐元年復隸祁州

金

深澤縣 隸祁州

元

深澤縣至元二年併入東鹿三年復隸祁州

明

深澤縣 隸祁州

國朝

深澤縣 初隸祁州雍正二年改定州爲直隸州隸定州

疆域

四正

東鄰安平縣以本縣馬壘村大興村爲界距縣治二十里自界至安平縣四十里  
西鄰無極縣以本縣大鎮村小鎮村爲界距縣治十五里自界至無極縣二十五里  
南隣東鹿縣以本縣河莊爲界距縣治十里自界至東鹿縣八十里  
北隣定州祁州以本縣東故羅村西故羅村爲界距縣治二十里自界至定州七十里至祁州四十里

四隅

東南鄰東鹿縣安平縣以本縣河疇村爲界距縣治三十里自界至安平縣四十里至東鹿五十五里

西南鄰晉州以本縣寺頭村方元村爲界距縣治十五里自界至晉州二十五里  
西北隣定州以本縣西內堡村爲界距縣治二十里自界至定州七十里

東北鄰祁州以本縣王家莊張家莊爲界距縣治十五里自界至祁州四十五里

廣袤

東西三十五里



淡澤縣志  
南北三十里

西北至定州九十里

東北至保定府一百八十里

東北至

京師五百里

山川

滹沱河在縣南曰虜池亦曰惡池別作亞駝又作呼沱惡沱山海經秦戲之山虜沱之水出焉秦頭之山其水南注於虜池禮記晉人將有事於河必先有事於惡池秦穆公伐楚詛楚文曰告盟於不顯亞駝大神韓非初見篇中山呼沱以北不戰而畢爲燕法言吾子篇浮江海而知江河之惡沱按後漢書注云滹沱經定州深澤縣東南謂定州屬之深澤縣非從定州入深澤也滹沱原不入定州界舊志曲爲之說乃讀註之誤東南卽光武渡處名危渡口

又按今滹沱由山西繁峙代州崞縣忻州定襄五台孟縣歷三百九十五里入直隸平山縣界治河合焉又東行一百八十里入靈壽縣界又東南二十里匯松陽河衛河入正定縣界又東行五十餘里入藁城縣界正定之柏棠河護城河林濟河旺泉河東大道河藁城之只照河皆要渠也至此層次南趨一一收入而滹勢漸大又東行五十餘里入晉州界又東行三十餘里入束鹿縣界深澤東南僅存故道由束鹿抵深州入滄陽河達於海

滋河在縣西北山海經高是之山滋水出焉而南流注於虜沱一作瀆亦曰磁集韻瀆水在常山郡唐景福二年王克用伐常山王鎔敗之於滋水卽此按一統志謂源出

山西五台縣界元和志則謂源出山西靈邱縣枚回嶺漢書地理志寰宇記均謂與溇沱合流皆與今水道不合

又按今滋河發源靈壽縣墨黑駝山大明川其上游汭河其所翁注也東行一百五十里入行唐縣界又東行三十餘里入新樂縣界又東行三十里入藁城縣界又東行二十里入無極縣界而大明劉家等溝入焉又東行五十餘里入深澤之堤北村下流入祁州界與沙河唐河合流俗名三岔口達於海

木刀溝在縣西北寰宇記云濊水出房山入博陵謂之木刀溝唐元和五年河東節度使范希朝等敗成德軍王承宗於木刀溝即此又云木刀溝亦名長淋溝今俗訛爲木道溝

按今木刀溝起於新樂縣之閔鎮村閔泉其源也北爲林河東北爲曹河又東北爲浴河至馬家橋邯臺等村並滙入焉上承行唐山溪之水經藁城東達無極至深澤賈村侯村與無極東侯等溝合流由西內堡入定州界下游由祁州入滋河

河防

邑受水患南潯北潩潯沱之患雖烈其淤可以肥田傷秋稼尙獲夏麥不無微利自康熙二十三年後潯水不北注麥秋漸薄而水患亦少惟潩水堤工每春修築橫堤圈一處尤爲緊要非未雨綢繆巡視維勤蟻穴一開鯨波立至故潩之害尤鉅

潩河堤自西鄉堤北村起與無極縣東漢村交界至北鄉段家莊止與邳州崔章村交界延袤逶迤南北兩岸共計六十六里有周家口張家口楊家口杜家口康家口郝家口趙八莊寺後口賈家莊口張家莊口百花口等處河灣水猛最易衝決每夏秋雨淋水發邑令督各鄉民照界堵葺晝夜巡守此舊例也乾隆三年七月初河水驟溢趙八莊決口二十四丈縣屬鄉村被淹者十之八九知縣謝杰詳請發帑修築隨奉檄行估計按照土方共需銀三千六百二兩有奇於四年二月興工越兩月告竣本道溝發源新樂縣之閔泉中歷藁城無極二邑地皆沙身低埝其迹或隱或見自極邑蔡莊界起經縣北呂村侯村賈村田家莊羊村北留屯王家莊諸鄉而滙於西內堡乃入定州界緣壅廢日久每夏秋霖雨瀝水爲災四邑民均有受害雍正十一年無極知縣方正玠詳請四州縣協力疏通奉文飭行在案然各邑所濬或不按故道致西內堡等村有著無洩滋爲民病方令又詳稱此溝應自州屬木佃七級等村而

東南開至東內堡西北接入清水溝至深邑段家莊入於潁河今定州由七級木佃向南開至草橋遽令入河查草橋地勢頗高河流不免倒溢反足爲害等語值西內堡鄉民亦據情上陳乾隆四年冬督院孫公嘉淦委清河道魯之裕親行會勘始詳定由七級村南轉而東北達清水溝以入潁河於是知縣謝杰督各附近村民撥夫挑濬自呂村至西內堡計長十八里有奇面寬三丈五尺深三四五尺不等又令鄉民協同州民仍毀州開新渠塞草橋水口各村瀝水始得循故道河歸惟地多浮沙所宜督令鄉民按時挑濬以謀經久本案內又自邑西陳家莊起至賈村南舊木道溝止地勢窪下時患瀝水乃開新渠一道自村北迤邐而西復折而北計五里許面寬一丈二尺至一丈五尺深尺餘至三尺不等引水歸木道溝徐達於河而縣西北陳家莊侯村賈村呂村等鄉水患亦息

按木道溝有新舊二道舊道由無極之泊頭西廊中廊西宋東宋等村歷定州之趙家莊木佃村入深澤之西內堡再由定州七級村入清水溝以達於滋河雍正間故道淤塞泛溢爲患遂自無極之大陳小陳講音諸村冲開新道由深澤之賈村羊村北留屯歸州境木佃村故道此新道舊道之所由分也故道既淤新道久未疏濬是以水易泛濫民田屢被其害道光年間定州民與無極民屢興詞訟經委員會勘始

議挑溝築堤而定深所濬者新道無極所濬者故道兩不相顧竟無成功然新道順水之性雖所經盡屬民田而水行已逾百載治之易成功亦易也故道固爲舊迹而半多浮沙旋挑旋廢且自木佃至七級一帶已無形勢可尋居民墾種有年久成業地治之難廢之甚易也定州志頗載其詳今爲撮其大略後之治者宜審目前形勢通算全局慎勿妄興民力也

官道溝在縣東因縣西瀝水從無極東漢等村而來滙於東關舊有道溝一條繞城東趨每當霖雨或河水溢時環城之水藉此流入安平界由饒陽東歸於河近因兩岸土壅水漲則濺流莫洩三關盡屬沮洳有妨農功商賈乾隆五年知縣董五瑞詳情會同安平縣一體接濬自東關起歷野莊頭趙莊馬壘大興等村至安平縣之崔安舖計二十里有奇面寬一丈六尺深尺餘至三四尺不等而郭西各鄉如堤北之水濬之達於黎元中山溜頭之水濬之趨於城南秀武之水濬之達於城西而皆歸之東關以東趨而出境又有不通於官道溝者如邑東北宋家莊起至王家莊與邠州張家莊交界止有舊溝一段長六里許寬深視官道溝一體挑濬以消瀝水而縣東與北水患各息

按深邑彈丸之地南漳北潯環繞其間考潯水自康熙初年已徙而南而潯河於道

光年間即形淤塞木道溝新舊二道疏濬乖方各鄉官道溝又久不挑濬近今雖未  
有水患然旱潦不常滄桑易變莅斯土者慎勿狃目前之安忘經久之圖也

古蹟

南深澤城○通志云南深澤漢初爲侯國後置縣屬涿郡北齊廢隋復置舊志云南澤澤故城在縣東南二十七里○按今之深澤即南深澤非侯國也二縣以所隸言之似不應止隔二十七里且考之史乃深澤廢而南深澤存亦不應南深澤反有舊城也今邑東南有故城村或因此而訛傳爲故縣歟

女媧神祠○見魏書地理志今無考

水凍村在縣城南爲漚沱河北光武避王郎至此冰合故名

危渡口在城東南漚沱河上即光武渡河冰合處

苦水村在縣東南十五里相傳光武經此遣人取水人以惡水與之光武怒潑之於地曰此處不當世喫苦水耶故至今以苦水名村

息馬村在縣南十二里漚沱河北光武曾息馬於此今訛爲洗馬

留屯在城北光武曾屯兵於此故名

按靈壽縣志有地名忽凍云漢光武渡兵冰合處深州志有凌消村蕪萁亭饒陽志有麥飯亭皆云光武渡漚沱處考漚沱綿亘數百里光武微時數經臨北地至冰合處究不知當在何所各縣志皆引以爲勝迹舊志載危渡口即光武渡兵冰合處而



水凍苦水息馬留屯等村亦皆因光武經臨得名殆重其人故附會其說歟抑實從深澤而訛於他邑也然不可考矣

中山蜃氣○中山村去城南六里每清晨霧露時現城郭狀隱約雲端柝樓雉堞宛然在目豈大造之間空虛變幻無所不有也其所以然蓋難確指云

五鹿津口通志云在深澤縣寔字記云在縣南十五里漚沱河津濟處今無考

劉盆子墓在留屯村今古壠尙存按後漢書劉盆子大山式縣人後降光武以爲趙王郎中久之病失明賜滎陽均輸官地以爲列肆使食其稅終身則盆子之生之歿皆於深澤無涉未應葬骸於是也舊傳多訛姑俟再核

尙宰相墓在城西南二里許傳爲元尙文之墓○按本傳文世爲深澤人後徙保定則文生於澤未必卒於澤而古壠尙存縣境意者前賢重父母邦不忘首邱故終葬於澤歟

孝烈里在北趙八莊節婦郝延儒妻王氏所居也事詳節烈

十景附

北臺柳月

西院荷風

文昌塔影

興化泉香

泰樓望雪

皇閣觀瀾

中山蜃氣

古井龍珠

神波驗雨

漢渡留冰

按郡邑志有十景八景之說最爲志書陋習曲陽志刪之陸清獻公靈壽志遵用其例深邑舊有十景內神波驗雨一則地屬無極未免借材異地餘亦半多荒廢今將中山蜃氣載入古蹟餘皆削之而存其名庶不爲讀志者所誚



深澤縣志卷之三

建置志

古者分疆敷治設險則有城池莅政則有署宇澤宮爲教化之本事神亦成民之終鋪遞橋梁無非因民之利當其始也莫不卜叶允臧期於永久而歷年既遠或存或圯其事不一然皆足見前人經畫之詳防慮之周所當審時度勢修而復之或因以通其變也若藉口重用民力而百務俱弛是傳舍其官者之所爲也志建置

城池

縣城未詳創建何年周四里一百六十七步高二丈五尺上闊一丈下闊二丈一尺池闊一十二步深一丈角樓四門三東曰廣陽南曰懷德西曰安遠明正統中知縣高文修築未久傾圯景泰中知縣陸通成化中知縣梁驥正德中知縣李文繡嘉靖中知縣李承式隆慶中知縣宋之范各增修萬歷間知縣陳來朝增置甕城改東門曰受生外曰崇仁南門曰暢明外曰順化西門曰悅物外曰尙義

國朝康熙十三年東門樓坍塌知縣許來音重修又以城濠淤塞於十四年募工開疏一如舊制三十年知縣陳奕禧重修四十五年知縣蔣洪澍大加修築先是修築率

多簡略甚或剝厚就薄以取平直名曰增修實損其舊是役因濠取土且濬且築下  
增厚五尺上增厚二尺築成雉堞煥然改觀而皆按社撥夫官捐日食故工成而民  
不擾及工竣後濠內忽遍生蒲草彌望青葱衆咸異之○按邑有城池民之保障所  
係綦重縣城在康熙二十年以前制度仍爲完備城上有門樓有埤牆有更鋪有守  
具城外堤上有更鋪城內大小巷口皆有柵欄修城則本縣十五社民春月分界補  
葺其後漸不如如舊遂至睥睨一空蔣令一修之後竟難其繼近者坍塌日甚畚插  
無聞雨水衝啣如懸崖斷岸至不可往來總緣怵於勞民不敢擅動人夫雖羽檄飛  
催令設法捐修亦僅抱空言誠守土者之深憂也

公署

縣治在城中西北偏宋熙甯以後縣分治併廢元祐初復置元順帝時縣復廢洪武四  
年知縣閻毅始修復如制嘉靖中知縣韓達重修增置庫樓○按舊志謂縣署漢唐  
以來爲州治元改爲縣考沿革所據各史縣並未嘗爲州治也故不敢仍其舊

儒學公廨在文廟西教諭在前訓導在後

典史公廨在縣治大門內大堂西

察院衙在縣治東今改建忠孝等祠及倉廩

太僕寺在縣治西隆慶初知縣宋之范改修爲書院

僧會司在縣治西興化寺今廢

陰陽學醫學俱在縣治西洪武九年知縣顧誠建今廢

公所附

旌善亭在縣治東今廢

申明亭在縣治西今廢

稅課局在縣治東洪武十七年知縣姚思誠建今廢

監獄在邑治儀門內之西

教場在東門外半里許有演武亭三間

恤政附

養濟院在申明亭南明知縣陳來朝建

漏澤園二一在東城外一在西城外俱知縣陳來朝建



壇廟

至聖廟在縣治東宋元祐三年縣令許安石創建元至順三年縣令毛景謙明洪武二十八年知縣李珪永樂十四年知縣王源各重修成化十八年知縣梁驥改遷故址西南六十步重建正德十二年知縣張廷舉嘉靖四十五年知縣閻奉恩相繼重修

國朝康熙四十二年知縣蔣洪澍重修教諭芮而發訓導董鈞率諸生修置祭器如制雍正六年教諭張淑祺武舉袁維京生員李珣鑠捐資重修次年知縣劉元暉重修明倫堂乾隆五年知縣謝杰倡捐大修一律重新道光二十四年知縣劉衡倡捐修葺大成殿戟門櫺星門名宦鄉賢祠二十八年知縣衛東陽續修東西廡泮池照壁二十九年知縣楊挺將崇聖祠改建於大成殿後並將明倫堂一律重修立碑廟中紀其事

廟制大成殿五間兩廡各七間戟門三間櫺星門三間泮池一區左右學門各一間崇聖祠三間在正殿北

名宦祠鄉賢祠各三間在戟門外

明倫堂三間在崇聖祠後

敬一亭在明倫堂後今廢



尊經閣在北城上今廢

文昌廟在城東南隅明萬歷間知縣陳來朝建於城上

國朝康熙三十一年生員劉灝等改建城東南隅西向俯臨碧池五十四年生員王椅  
趙臨袁紹祖等修築東西堤路一十四丈道光二十九年知縣楊挺重修

附祭田十畝明天啟間知縣張元置

魁星塔在東南城角創建無考道光二十九年知縣楊挺重修

關帝廟在邑南門外創建無考明成化十四年知縣李仁縣丞牛宏增修

國朝康熙二年武進士袁斌重修乾隆十八年袁智袁湘等重修並增建後殿

附祭田二十畝明天啟間知縣張元置

社稷壇在西關外雍正十一年知縣邱軒昂奉文修築 攷定制壇而不屋高二尺一寸

東西二丈五尺南北如之壇下南一十二丈東西北各五丈壇面鋪石繚以周垣四  
出陛各三級壇面正中埋石主三座方一尺長二尺五寸露圓尖餘埋土中另設神  
牌二以木爲之硃漆青字高二尺四寸寬六寸跌高五寸寬九寸五分左書縣社之  
神右書縣稷之神臨祭置其上

風雲雷雨山川壇在南關外創建無考 壇制正中埋石主三座另設神牌三中書風雲

雷雨之神左書某縣境內山川之神右書某縣城隍之神餘與社稷壇同

先農壇在東關外雍正六年知縣董五瑞奉文修築置藉田四畝九分神牌硃漆金字書

先農之神壇後正房三間中奉先農神牌東擗祭器農具西擗藉田米穀配房各一

間東置辦祭品西看守農民居住繚以周垣門南向餘與社稷壇同

厲壇在北城外

城隍廟在邑治西明洪武二年創建正德間邑人昌邑縣丞王志仁重修嘉靖二十九

年鄉民張仁等萬歷十三年鄉民邱仲清等相繼重修

國朝雍正十三年武舉袁維京等重修道光七年邑人

等重修咸豐八年知縣

許忠重修

附祭田七畝四分七厘

馬神廟在邑治東創建無考康熙十二年知縣許來音重修

劉猛將軍廟在縣署儀門右雍正二年知縣劉璋奉文建成豐八年知縣許忠重修

土地祠在縣署儀門左創建無考咸豐九年知縣許忠重修

忠義孝弟祠在縣治東雍正八年奉文建成豐八年知縣許忠重修

節孝祠在忠孝祠右雍正八年奉文建

生祠附

李公祠在北帝廟內祀內縣李承式

魯公祠在縣治西祀知縣魯之賢今廢

陳公祠在縣治西祀知縣陳來朝今廢

六賢祠初名許公祠在城隍廟東初祀知縣許來音後益以魯之賢陳來朝李遇春符

渭英蔣洪澍名六賢祠邑人王宗洛爲之記

凡壇廟之創修均詳此志若祭祀禮儀則總見典禮志其不在祀典暨雖在祀典而爲民間創置崇奉者附列於後

至聖廟在東故羅元至正間里人雷州教授杜儒建

至聖廟在東野莊頭明萬歷間里人曲阜縣教諭翟世顯召曲阜匠建造

至聖廟在趙八莊明萬歷間內官王臣督建

關帝廟在南關外乾隆二十六年山西商人創建爲闔邑商人賽神之所制度崇宏牆垣

鞏固爲一邑巨觀俗名山西會館

關帝廟在劉家莊明嘉靖間內官樊英弟樊自安等創建崇禎四年鄉民成世堪重修附

香火地九畝六分四厘

關帝廟在白家莊元至元間創建明成化嘉靖萬歷年間本村民相繼重修有香火地二十六畝

按 關帝聰明正直沒爲明神我 朝疊加崇封至尊之與 先師等而俚俗商人乃家家崇祀以求福則近於誣而褻矣知禮者其辨之

真武廟在北城上明嘉靖間知縣李承式創建

國朝康熙五十年武舉袁維京重修嘉慶六年知縣蕭泗水大加修築臺階易土以石咸豐十年知縣許忠將臺前築爲甬道兩旁濬濠堤旁植柳百餘株並置花牆朱欄煥然改觀

真武廟在西關創建無考明萬歷間知縣蔣學孔重修

真武廟在大興村創建無考順治四年知縣周召南生員胡拱宸等重修附香火地二十一畝九分

按明史真武乃元武七宿後人以爲真君作龜蛇於其下宋真宗避諱改爲真武靖康初加號佑聖助順靈應真君自道家以真武爲淨樂王太子修煉武當山功成飛昇而世之建祠崇祀者近於誣矣

藥王廟在東關外創建無考明萬歷間知縣孫淵如貢生杜邦俊等重修

火神廟在南關外康熙五十年武舉袁維京等創建咸豐元年卞廷選等重修

按火神蓋即所謂祝融回祿歷代祀之自宋有火德真君之號而世之祀火神者多雜入道家言不可不知

東嶽廟在南值腰村唐朝創建宋嘉祐間重修明宏治五年生員呂文通等重修教諭傅英撰立碑記嘉靖二十九年鄉耆郭君瑞等重修知縣鄭禮撰立碑記有香火地十畝三分

東嶽廟在西內堡唐時創建明天啟六年御馬監太監張教督修大學士方從哲撰立碑記有香火地二十畝

按古者諸侯祭其境內名山大川自唐開元中用道士司馬承禎言封泰山爲天齊王宋復加封爲天齊仁聖帝雜入道家言而州縣遂立廟祀之近於誣矣

分水龍王廟在西城濠上順治十二年知縣范時秀創建康熙九年知縣許來音重修嘉慶二年生員王鍾學等重修

龍母廟在賈村元至元間知縣劉彰甫創建至正三年邑宰因亢旱祈禱密雲中恍惚有龍象大沛甘霖鄉貢進士蒙古馬某撰立碑記即龍潭一名龍堂

國朝康熙十一年知縣許來音重修

按龍乃四靈之一廟祀古不多見自宋祈雨於五龍廟及九龍堂後多因以祈禱雨澤廟祀遂徧於天下至廟貌冕服擬於王者特世俗從二氏之說耳又從而祀其母則更誣矣知禮者其辨之

土地五道廟在邑治西創建無考順治十八年耆民胡玉重修

三官廟在邑治東創建無考明嘉靖天啟間耆民胡隆王宗道等相繼重修

三義廟在李家莊創建無考明嘉靖間鄉人劉廷漢等重修有香火地十三畝

按以上各廟所以安神者十餘所其中或天之神也地之祇也而以人之鬼事之則土木而衣冠之矣或人之鬼也而以天之神地之祇事之則神聖而帝王之矣皆非禮之正也若土地則司此民者也龍神則澤此民者也藥王則嘗瘳民之疾病有功於人者也以不在祀典之內故不敢入之秩祀其餘或祀之非其地或求之無其人或稱之不得其宜不妄則誣或僭且濫君子慎之矣

### 寺觀附

興化寺古名大忍寺在縣署西創建無考碑記稱係六祖曹溪道場昔永峯大禪師開山於茲有大忍寺門樓碑唐開元十八年題額八分隸書筆力遒勁歲久剝落名姓莫考宋崇寧二年寺易今名金天會二年重修元季毀兵燹明正統間知縣高文重

修宏治間僧性空募建大悲閣鑄大悲觀世音銅像二十有八尺臂四十有二有香火地二十二畝殿東有香泉

國朝康熙三十二年知縣陳奕禧建亭於泉上並立碑記

慈雲閣即白衣庵在縣治西南隅明萬歷間生員宋同亨等創建大學士孫承宗撰立碑記生員何于道創造觀音庵鑿池甃橋知縣符涓英撰立碑記

福勝寺在趙莊唐太和六年舍人徐福主事盧庸創建明成化嘉靖間村民黎自均黎守陽等相繼重修

興果寺在濯頭村元至正間僧永峯創建明永樂間耆民李芳重修

興圓寺即今大悲閣在趙八莊創建無考明嘉靖間村人乾清宮太監樊英重修戶部侍郎韓寅撰立碑記

七里庵古名海會庵在邑治北七里舊村名邱家莊明萬歷間僧文寶募建

三教庵在邑治西二十里並市村創建無考順治十八年知縣符涓英重修

泰山元君行宮在孤莊村創建無考明天啟間村人內瑞楊某重修

蒼山聖母行宮在王家莊創建無考順治五年知縣李遇春重修邑人嘉興府知府王

鏡撰立碑記有香火地十畝

天仙廟在大鎮村明嘉靖初年鄉人內官監太監曹喜內府庫太監曹安創建萬歷間鄉民曹聘等重修

碧霞宮在趙八莊明萬歷九年乾清宮太監王臣創建有香火地三十三畝三分

按建寺修庵亦鄉民募善之意也然而非其道夫孝親敬兄尊長親上睦族教子養老恤貧善之大也立家廟置義田行社倉謹鄉約早完課糧守法息訟通橋道賑窮乏善之實也不此之務而惟崇土木之工惑洞天福地之說甚者借化募之名恣其中飽溺虛無幻怪之事流爲左道豈知私創庵院律之所禁迎神賽會法所不寬奈何以慕善之心蹈長惡之罪乎舊志載梵宮釋刹幾四十所今擇其有關事跡者略存一二餘俱刪削庶使民知所趨向云耳





社學

樂善書院在東故羅村元至正乙酉鄉人杜儒建順帝聞而義之擢爲教授賜以茲名  
今廢

香泉書院在城隍廟東創建無考康熙三十年知縣陳奕禧重修名爲香泉書院四十  
九年知縣陳雅深重建改爲喬山書院乾隆辛巳知縣仲周霈重修更名滋陽書院  
嘉慶癸亥知縣蕭泗水重修復名香泉書院咸豐九年知縣許忠以書院傾圮捐資  
修葺改爲義學十年復廣爲勸捐重加修整並復書院舊規立有碑記

南街義學雍正十一年紳士袁維京等創建並置義田二十畝今廢

故城義學乾隆八年生員張如載獨力捐修並置義田三十畝其義學基址則張奇甯  
所捐今廢

又四鄉義學一在南值腰一在鐵干一在息馬一在西內堡一在南趙八莊一在北趙  
八莊俱康熙五十四年奉文創建今廢



倉廩

常平倉在縣治東明洪武中知縣姚思誠創建隆慶中知縣宋之范重修

國朝雍正八年知縣邱軒昂奉文承領藩庫銀一千一百五十二兩修築新倉三十六間每間高一丈七尺深一丈八尺闊一丈二尺

預備倉四一在故城社一在秀武社一在白莊社一在河莊社創建無考今俱廢

社倉五一在西故羅一在南趙八莊一在大堡一在大角頭一在中央創建無考

義倉五一在大堡一在鐵干一在西河一在趙八莊一在西故羅乾隆十七年知縣蔣

邦伯奉文創建



坊表

天鑒在茲 縣治前

強教 縣治左

悅安 縣治右

青雲得路 文廟前神路坊知縣陳來朝建

德配天地 文廟左

道貫古今 文廟右

太和仙境 北帝廟神路第一座

治世玄嶽 北帝廟神路第二座

北嶽具瞻 北帝廟神路第三座

玄武重鎮 北帝廟堤上石橋前

經元 已卯科舉人杜游藝建在東街

恩節雙榮 左長史張順治母 請封太宜人宋氏建在中大街

三休恩綸 戶部郎中王朝棟建在中大街

循良繼武 萬歷丙子科舉人趙友直建在中大街

海澤縣志  
憲臺 分巡冀南兵備道副使劉素建在中大街

地官分曹 戶部山東清吏司主事劉素建在中大街

龍章寵錫 陝西鞏昌府同知李麟禎建在中大街

錦衣 錦衣衛指揮同知樊自秀建在西大街

貞節 生員王吉士妻曹氏建在南街

閭里

在城街四

正義 迎恩

宣化 明道 出祁州志

東鄉

翟家莊 距縣一里

王家場 距縣二里

王家莊 距縣四里

封莊 距縣五里

南冶莊頭 距縣八里

東焦家莊 距縣十里

西三江村 距縣十里

馬舖 距縣十二里

息馬村 距縣十二里

南旺 距縣十三里

東莊 距縣一里

東袁家莊 距縣二里

五千 距縣五里

西焦家莊 距縣八里

中左 距縣九里

邳家莊 距縣十里

南直腰 距縣十里

息馬營 距縣十里

小直腰 距縣十三里

武羊舖 距縣十四里



大直腰 距縣十五里

北馬 距縣十五里

孝敬 距縣十六里舊係衛屯

中央 距縣十八里舊係衛屯

何家莊 距縣二十里

故城 距縣二十里舊係衛屯

周家莊 距縣二十里

鐵干 距縣二十五里東接安平界

棗營 距縣二十五里東接安平界

張村 距縣二十七里

南鄉

邱家莊 距縣一里

劉家莊 距縣二里

趙家莊 距縣四里

南袁家莊 距縣四里

趙莊 距縣十五里舊係衛屯

杜社 距縣十五里

小堡 距縣十六里

苦水 距縣二十里

東三江村 距縣二十里

大堡 距縣二十里舊係衛屯東接安平界

馬壘 距縣二十里舊係衛屯東接安平界

大興 距縣二十五里東接安平界

杜家莊 距縣二十五里

河町 距縣三十里東南北三面接東鹿安平界

王家莊 距縣二里

彭家莊 距縣三里

西趙家莊 距縣四里

乘馬 距縣五里

北中山 距縣五里

魏村 距縣七里

中角頭 距縣八里

小封 距縣八里

河莊 距縣十里南接東鹿界

北濯頭 距縣十里

西鄉

張家莊 距縣一里

南劉家莊 距縣五里

石橋頭 距縣八里

南趙八莊 距縣八里

北留屯 距縣十里

大陳家莊 距縣十里

小黎元 距縣十五里

呂村 距縣十五里

南中山 距縣六里

大角頭 距縣八里

西角頭 距縣八里

水凍 距縣九里

南濯頭 距縣十里南接晉州界

西河 距縣十二里

北劉家莊 距縣五里

夾河 距縣八里

北趙八莊 距縣八里

南留屯 距縣八里

田家莊 距縣十里

霧頭 距縣十二里

侯村 距縣十五里

秀武 距縣十五里

賈村 距縣十五里

羊村 距縣十六里

大鎮 距縣十六里西接無極界

大黎元 距縣十六里

寺頭 距縣二十里南接晉州界

並市 距縣二十里

堤北 距縣二十里相傳尙文故里

方元 距縣二十里

小鎮 距縣二十里西接無極界

北鄉

北袁家莊 距縣一里

郭家莊 距縣一里

小賈家莊 距縣二里

馬家莊 距縣二里

杜家莊 縣距二里

刁家莊 距縣三里

關家莊 距縣三里

軍家莊 距縣三里

大王莊 距縣三里

賈家莊 距縣五里

閻家莊 距縣五里

北趙家莊 距縣五里

李家莊 距縣五里

小陳家莊 距縣七里

孤莊 距縣八里

南白家莊 距縣九里

北白家莊 距縣十里

宋家莊 距縣十三里

北冶莊頭

距縣十五里

張家莊

距縣十五里

西內堡

距縣十六里北接定州界

南營

距縣十八里

王家莊

距縣二十里

西故羅

距縣二十里北接定州界

東故羅

距縣二十里北接祁州界

段家莊

距縣二十五里舊係衛屯北接祁州界

按舊志載鄉村七十九東鄉曰孝敬十四村南鄉曰尚義三十三村西鄉曰忠信二

十二村北鄉曰文教十七村至圍城村莊率略焉弗詳今悉按圖登載庶覽者易於

稽考

里社十有五

在城

石橋

秀武

留屯

白莊

武羊

故羅

故城

小值

小堡

河莊

中山

南營

趙莊

續興

集市五

在城集

二七日

鐵干集

三八日

趙八莊集

四九日

大堡集

五十日

故羅集

三八日

約所十三

興化寺 在城

三江村

鐵千村 俱南鄉

堤北村 俱西鄉

大堡

趙莊 俱東鄉

留屯

故羅

大直腰

北溜頭

趙八莊

白家莊 俱北鄉

橋梁

溥濟橋二座東關外乾隆八年知縣謝杰倡修並增築橋東長堤

通濟橋三座南關外乾隆八年武舉袁智等捐修並加石欄

安濟橋西關外元至正八年達魯花赤康里安安建

永濟橋趙八莊石橋跨澧水明萬歷間敬侍夫人郝氏命內侍王臣督建橋長二十一丈闊一丈九尺高一丈八尺有奇有記

普濟橋石橋村跨澧水今石橋毀土人以木成之

廣濟橋留屯村木橋跨澧水

樂濟橋段家莊東跨澧水雍正十年本莊士民段擢等募建

德濟橋介留屯李家莊兩鄉之間跨澧水康熙三十年間鄉人李宗伯王瓚等創建雍正

十一年趙玉王瑛劉敬止等重修



舖遞

總舖在縣治前額設舖兵四名南接西河村舖北接張家莊舖西北接西內堡舖  
西河舖在縣南路額設舖兵二名東接安平縣北馬舖西接晉州東曹舖南接束鹿縣  
山王口舖北接本縣總舖

張家莊舖在縣北路額設舖兵二名南接本縣總舖北接邴州婁底舖  
西內堡舖在縣治西北路雍正二年改隸定州後新添舖兵二名  
婁底舖在縣西北路雍正二年新添舖兵二名

墩墩附

墩墩五座東馬壘西趙八莊大鎮南河莊北張家莊各一座





兵防附

順治八年晉州東曹村王總練以束鹿小章村東介深州西隣晉州北接深澤南連東鹿東北與安平爲界西北與無極爲界居六邑之中恐爲盜賊之藪呈報晉州知州轉詳以爲必有兵以鎮之方保無虞巡撫馬公光輝題准添設千總一員馬步兵丁百名駐小章嗣後撥發別所僅餘兵丁五十三名康熙三十年巡撫趙公宏燮於縣城添設防官一員將小章汎兵丁撥赴深澤馬兵二名步兵六名以防倉庫城池雍正七年裁去防官將兵丁仍歸小章汎統轄道光二十二年將小章汎千總改爲把總現在駐守馬兵四名步兵十名

深澤額設民壯五十名雍正六年奉文撥赴按察司四名保定府六名理事廳十名現額民壯二十五名

深澤舊有鄉兵四路各一百名世役也凡守城防獄之事皆有鄉兵輪班值夜有鄉把總二名爲之長歲霜降日集教場操演康熙間承平日久此役遂廢



深澤縣志卷之四

典禮志

禮之於人大矣孔子曰安上治民莫善於禮太史公曰至矣哉立降以爲極而天下莫之能損益也邑有禮制今古率由豈文也哉威儀所以定命敬神所以勤民毋曰儀文缺略器物遺殘遂委嘉會於草莽也民風之舊禮俗之行以類附焉上者因之次利導之教化而整齊之下與之爭爭猶愈於隨靡也以禮型民化俗以復於古惟其人哉志典禮

祀典上

文廟正殿祀

至聖先師孔子

四配

復聖顏子

宗聖曾子

述聖子思子

亞聖孟子

十二哲

先賢閔子損

先賢冉子雍

先賢端木子賜

先賢仲子由

先賢卜子商

先賢有子若

先賢冉子耕

先賢宰子予

先賢冉子求

先賢言子偃

先賢顓孫子師

先賢朱子熹

東廡從祀

先賢蘧子瑗

先賢澹臺子滅明

先賢原子憲

先賢南宮子适

先賢裔子瞿

先賢漆雕子開

先賢司馬子耕

先賢梁子鯁

先賢冉子儒

先賢伯子虔

先賢冉子季

先賢漆雕子徒父

先賢漆雕子哆

先賢公西子赤

先賢任子不齊

先賢公良子孺

先賢公肩子定

先賢鄒子單

先賢罕父子黑

先賢榮子旗

先賢左人子郢

先賢鄭子國

先賢原子亢

先賢廉子潔

先賢叔仲子會

先賢公西子與如

先賢邾子巽

先賢陳子亢

先賢琴子張

先賢步叔子乘

先賢秦子非

先賢顏子噲

先賢顏子何

先賢縣子亶

先賢公明子儀

先賢樂正子克

先賢萬子章

先賢周子敦頤

先賢程子顛

先賢邵子雍

以上先賢四十位

先儒公羊子高

先儒伏子勝

先儒董子仲舒

先儒杜子子春

先儒王子通

先儒韓子琦

先儒歐陽子修

先儒謝子良佐

先儒李子侗

先儒蔡子沈

先儒魏子了翁

先儒趙子復

先儒吳子澄

先儒胡子居仁

先儒羅子欽順

先儒湯子斌

先儒后子蒼

先儒諸葛子亮

先儒陸子贄

先儒范子仲淹

先儒楊子時

先儒羅子從彥

先儒呂子祖謙

先儒陳子淳

先儒王子柏

先儒許子謙

先儒曹子端

先儒王子守仁

先儒黃子道周

以上先儒二十九位

西廡從祀

- |        |         |
|--------|---------|
| 先賢公孫子僑 | 先賢林子放   |
| 先賢宓子不齊 | 先賢公冶子長  |
| 先賢公皙子哀 | 先賢高子柴   |
| 先賢樊子須  | 先賢商子澤   |
| 先賢巫馬子施 | 先賢顏子辛   |
| 先賢曹子卹  | 先賢公孫子龍  |
| 先賢秦子商  | 先賢顏子高   |
| 先賢壤駟子赤 | 先賢石作子蜀  |
| 先賢公夏子首 | 先賢后子處   |
| 先賢奚容子蔑 | 先賢顏子祖   |
| 先賢甸子井疆 | 先賢秦子祖   |
| 先賢縣子成  | 先賢公祖子句茲 |
| 先賢燕子伋  | 先賢樂子欸   |
| 先賢狄子黑  | 先賢孔子忠   |



先賢公西子蒧

先賢顏子之僕

先賢施子之常

先賢申子棧

先賢左子邱明

先賢秦子冉

先賢牧子皮

先賢公都子

先賢公孫子丑

先賢張子載

先賢程子頤

以上先賢三十九位

先儒穀梁子赤

先儒高堂子生

先儒孔子安國

先儒毛子萇

先儒鄭子康成

先儒范子甯

先儒韓子愈

先儒胡子瑗

先儒司馬子光

先儒尹子焯

先儒胡子安國

先儒李子綱

先儒張子枳

先儒陸子九淵

先儒黃子幹

先儒真子德秀

先儒何子基

先儒文子天祥

先儒陸子秀夫

先儒陳子澹

先儒金子履祥

先儒許子衡

先儒薛子瑄

先儒陳子憲章

先儒蔡子清

先儒劉子宗周

先儒呂子坤

先儒孫子奇逢

先儒陸子隴其

以上先儒二十九位

正位陳設

祝板一 高九寸 廣一尺二寸 有架一

血豆一

帛一 色白

爵三

登一 羹太

銅二 羹和

簠二 稷黍

簋二 梁稻

籩十 白餅黑餅鹿脯形鹽  
羹魚榛菱茨棗栗

豆十 脾折豚胎鹿醢魚醢醢  
兔醢韭菹芹菹菁菹笋菹

牛一 俎

羊一 俎

豕一 俎

鏡二

鑑一

尊一 有勺疏

四配位陳設 東西各二案

帛一 色白

爵三

銅二

簠二

簋二

籩八 無白餅

豆八 無脾 豚脂

羊一

豕一 同俎

鏡二

鑑一

尊一 有勺疏 布幕

十二哲位陳設 東西各一案

帛六 色白

爵三

銅一

簠一 黍

簋一 稷

籩四 形鹽鹿 脯栗棗

豆四 菁菹 芹菹 鹿醢 兔醢

羊一

豕一 同俎

鏡二

鑑一

尊一 有勺疏 布幕

兩廡陳設 東西各二案

帛各一

爵各三

簠各一

簋各一

籩各四

豆各四

羊三

豕三 每羊一 俎凡三 俎同

鏡各二

鑪各一

尊三同皆有勺疏幕布

前祭二日地方官率教官掃除廟內外蠲滌瘞坎 設次於星門內左偏西向並主祭分獻陪祭各官坐次陳鼓左側 櫺星門外右偏東向設榜亭一座 下馬牌東西二十步所各列一牌當祭禁人來往 前一日辰刻教官出祭器陳列明倫堂設香案於牲房外 日午地方官偕陳設官先一日委派恭捧主祭官祝板及各承祭官執事生姓名榜行禮位次圖至學宮奉安祝板於祝案前正中詣

至聖先師神位前上香三炷行一跪三叩禮退掛榜亭內詣明倫堂監視祭器滌濯畢實

籩豆潔尊加勺冪陳列堂上正中候主祭官親詣省視如攝行則禮有差次臨時酌定 執事官及

襄事各生齊集堂之左右工歌陳樂於堂之前楹樂舞生各具服執籥秉翟齊集堂

階下俟演習禮樂 日晡後主祭官具吉服至明倫堂升座座偏左南向 各官以次三揖

畢主祭官起省饌豆禮尊唱贊生引並贊 省牲執事者牽牛過香案前省

畢唱贊復位主祭官復位各官以次序坐左一行西向 唱贊生請演禮禮如正祀

樂舞生請演樂樂如正祀演畢主祭官啟行各官隨出獻帛爵等儀遣員代

祭之日四鼓教官率各執事人陳設祭器祭品牲俎於各

神位前工歌陳篋簋簠琴瑟鼓柷敔等訖各齊集廟門外待事五鼓主祭官分獻官陪祭官

各朝服諸廟門外

下與馬步

由櫺星左右門入

文武左右

升次序坐

執事生皆侍立

茶二巡畢陰陽

官報聲鼓

唱鼓初嚴

赴巡

牌後疾

以百椽為節

在廟管

役及各官

從人等

俱出鼓

再

嚴

主祭官分獻官陪祭官俱起立

冠帶

容出

立丹墀

兩旁

先入

就位

鼓三嚴

生引主祭官以下魚貫入戟門內就拜位

旁立文在拜位

左武在拜位

右唱贊生唱

樂舞生各就位

各執樂器按位立

唱執事者各執

其事

司尊者就尊所立助祭生分東西陞上進

主祭官就位

俟立

分獻官就位

俟立

陪祭官各就位

俟立

班齊

瘞毛血

助獻生徹毛血槃置於

迎神

奏昭平之章

引贊跪下皆跪贊以三跪九叩首贊興

樂止

唱行初獻禮

司樂舉迎神樂

樂奏宣平之章

引贊跪下皆跪贊以前

詣盥洗所

濯水

進巾

分獻官各盥

者舉幕酌體

執帛者捧帛

執爵者捧爵

引主祭官自東階

詣

至聖先師孔子神位前

跪

左右獻帛右助獻帛

獻爵

如獻帛叩首

贊興

詣讀祝位

跪

引主祭官詣祝案前跪

分獻陪祭各官皆跪

樂止

贊讀

祝文維

年

月

日

官等謹以牲帛體齊粢盛庶品之儀致祭於

至聖先師孔子神位前曰惟

先師德隆千古道冠百王揭日月以常行自生民所未有屬文教昌明之會正禮和樂節

之時辟雍鐘鼓咸恪薦於馨香泮水膠庠益致嚴於俎豆茲當仲

春秋

敬修祀事以

復聖顏子

宗聖曾子

述聖子思子

亞聖孟子配尚饗讀畢仍樂作贊叩首贊興皆同以下贊詣

復聖顏子神位前引主祭官就跪獻帛如前獻爵如前叩首贊興贊詣

宗聖曾子神位前禮如前詣

述聖子思子神位前禮如前詣

亞聖孟子神位前禮如前其

十二哲分獻官

兩廡分獻官於讀祝後唱贊行分獻禮各行禮俱照主祭官初獻儀注初獻禮畢贊復

位引主祭官自殿右門出由西階下樂止唱行亞獻禮司樂舉亞獻樂奏秩平之章

引主祭官各分獻官亞獻禮畢贊復位俱復位如前儀樂止唱行終獻禮司樂舉

終獻樂奏敍平之章引主祭官分獻官終獻禮畢贊復位俱復位如前儀樂止唱

飲福受胙引主祭官自東階詣飲福位贊跪助獻二名捧酒胙立於飲福禮主祭官

授爵於左受福胙左跪者贊叩首贊興贊復位唱謝胙跪主祭官以下跪二叩

首贊興贊徹饌司樂舉徹饌樂奏懿平之章助獻生舉饌出殿左樂止唱送神司樂

舉送神樂奏德平之章唱跪主祭官以下三跪九叩首唱興讀祝者捧祝司

帛者捧帛司饌者舉饌詣瘞所讀祝者先跪取祝文司帛者次跪取帛司饌者

由殿左門出右配右哲由殿右門出兩廡各於其望瘞唱詣望瘞位主祭官率分獻

門出隨班往瘞所各捧跪於瘞坎之西唱復位樂止禮畢

崇聖祠祀

肇聖王木金父公

裕聖王祈父公

詒聖王防叔公

昌聖王伯夏公

啟聖王叔梁公

東西配位

先賢孔子孟皮

先賢曾子點

先賢孟孫子激

先賢顏子無繇

先賢孔子鯉

東西從祀

先儒周子輔成

先儒蔡子元定

先儒朱子松

正位陳設

祝板一制同前

爵五

簋二

羊一

鑪一

配位陳設

東西各一案

帛五色白

簋一

豆四

鐘二

先儒程子珦

先儒張子迪

血豆一

鉶二

籩八

豕一同組

尊一有勺疏布幕

爵三

簋一

羊一

鑪一

帛五色白

簋二

豆八

鐘二

鉶一

籩四

豕一同組

尊一有勺疏布幕



從祀陳設 東西各一案

帛一 色白

爵三

簋一

簋一

籩四

豆四

羊一

豕一 同俎

鏡二

鑪一

尊一 有勻疏布幕

丁祭日五鼓主祭官先至

崇聖祠行禮引贊生引入崇聖祠

唱贊生唱贊 執事者各執其事

司尊者就尊所立助獻生前東西階升各就應侍拜次前

立主祭官就位

俟立定唱 分獻官各就位

俟立定唱 瘞毛血

助獻生徹毛血漿如儀唱 迎神

跪

以下皆

贊二跪六叩首

贊興唱 行初獻禮

引贊生前並贊 詣盥洗所

濯水

進巾

詣體尊所

司尊者舉幕酌醴

執帛者捧帛

執爵者捧爵

引主祭官自詣祠左門入贊詣

五聖王神位前

跪

獻帛

授篚奠篚如儀 獻爵

舉贊五贊 叩首

贊興贊 詣讀祝位

跪

引主祭官詣祝案前跪讀

祝者舉祝板旁跪 分獻官皆跪

贊 讀祝文維

年 月

日謹以牲帛醴齊粢盛庶品之

儀致祭於

肇聖王

裕聖王

詒聖王

昌聖王

啟聖王之神曰惟王奕葉鍾祥光開聖緒盛德貽後積久彌昌凡聲教所覃敷率循源而

溯本宜肅明禋之典用申守土之忱茲當仲春秋敬修祀事以

先賢孔氏

先賢顏氏

先賢曾氏

先賢孔氏

先賢孟孫氏配尚饗

儀讀畢如贊叩首贊興贊詣

先賢孔氏神位前

跪

獻帛授篚奠篚儀獻爵

叩首

興詣

先賢顏氏神位前

禮如儀詣

先賢曾氏神位前

禮如儀詣

先賢孔氏神位前

禮如儀詣

先賢孟孫氏神位前

禮如儀

其從祀分獻官於讀祝後

唱贊

行分獻禮

二引贊生引二分獻官就東西神位

前行禮俱照主初獻禮畢

贊復位

唱行亞獻禮

引贊如

亞獻禮畢

贊復位

唱行終獻

禮引贊如前儀終獻禮畢復位唱飲福受胙引主祭官自贊詣飲福位跪左右助獻飲福

禮受福胙如前儀叩首興復位唱謝胙跪主祭官以下皆跪贊一跪三叩首興徹饌

助獻生舉饌送神跪皆祭官以下贊二跪六叩首興讀祝者捧祝司帛者捧帛

出如儀司饌者舉饌詣瘞所唱望瘞瘞坎東西各一人舉牲體及饌焚祝帛瘞饌豆唱

復位引贊生引主祭官以下俱出復次

### 附廟祀考

周敬王四十二年魯哀公即孔子舊宅立廟歲時致祀漢明帝永平二年詔郡縣學校皆致祀章帝元和二年始祀孔子於闕里魏主芳正始七年始祀孔子於辟雍唐貞觀四年詔州縣皆立孔子廟明洪武元年詔天下皆專祀孔子而諡則自魯哀公之誅尼父始漢元始元年諡褒成宣尼公後魏太和十六年改諡文聖尼父隋文帝贈先師尼父唐貞觀二年尊為先聖十一年尊為宣父永徽中改稱先師開元二十七年追諡文宣王宋大中祥符七年追諡至聖文宣王元至大中加號大成至聖文宣王明嘉靖九年改稱至聖先師孔子而諡始定塑像始於漢梁武帝在荊州起宣聖廟自圖畫而為之贊唐開元八年詔改顏子等十哲立像為坐像圖畫諸賢像於廟壁金明昌二年易兩廡畫像為塑像明嘉靖九年通撤天下學宮像祀以木主以

太牢祀始漢高帝十二年晉武帝太始三年詔太學及魯國致祭備三牲南宋元嘉二十二年議樂列軒縣舞六佾唐貞觀二十年議定國學釋奠用太牢登歌三獻樂舞如故州縣用少牢三獻無樂後唐長興三年用中祀例祭以少牢四壁諸賢各陳籩豆簠簋實以品物宋紹興十年詔文宣王殿與大社大稷並爲大祀金大定十四年詔宣聖廟登歌九奏牲用少牢明正統九年增樂舞七十二人嘉靖九年定議國學用十籩豆郡縣用八籩豆樂舞止用六佾

國朝雍正二年部頒儀制祭品如前春秋兩祀起於東漢元嘉二年二仲月起於北齊天保元年日用上丁起於隋開皇元年然國學與州縣異宜唐貞觀中復有四時致祭之詔明洪武元年定制春秋二仲上丁致祭

### 國朝因之

宋大中祥符二年詔封孔子父叔梁紇爲齊國公元至順元年加封啟聖王明嘉靖九年詔天下儒學並建啟聖祠改稱啟聖公以顏無繇曾點孔鯉并孟孫激稱先賢配饗程瑀朱松蔡元定稱先儒從祀萬歷二十三年以周輔成從祀

國朝雍正二年追封孔子五代王爵其啟聖祠改爲崇聖祠並增祀張迪咸豐六年以孟皮配饗位顏無繇之上

從祀考

諸賢儒之從祀也漢元和二年始祀七十二子於闕里魏正始七年祀孔子於辟雍以顏子配唐總章元年以曾子配開元八年以閔子騫等爲十哲宋元豐七年以孟子配大觀二年以子思從祀咸淳三年以顏曾思孟爲四配并升子張於十哲而左邱明以下若公羊高穀梁赤伏勝高堂生戴聖毛萇孔安國劉向鄭衆杜子春馬融盧植鄭元服虔何休王肅王弼杜預范甯賈逵等二十一人從祀始於唐貞觀二十一年宋元豐七年以荀況揚雄韓愈從祀淳祐元年以周敦頤張載程顥程頤朱熹從祀景定二年以張栻呂祖謙從祀咸淳三年以邵雍司馬光從祀元皇慶二年以許衡從祀至順元年以董仲舒從祀明正統元年以吳澄從祀二年以胡安國蔡沈真德秀從祀宏治九年以楊時從祀而洪武二十九年黜楊雄不祀嘉靖九年以申棖申績申堂申黨定爲一人止祀申棖罷公伯寮顏何秦冉祀並黜荀況戴聖劉向賈逵馬融何休王肅王弼杜預吳澄等十人不祀改祀林放蘧瑗鄭衆盧植鄭元服虔范甯等七人於其鄉進后蒼王通胡瑗歐陽修陸九淵從祀隆慶五年以薛瑄從祀萬歷元年以羅從彥李侗從祀十二年以王守仁陳獻章胡居仁從祀

國朝康熙五十五年以范仲淹從祀雍正二年復祀蘧瑗林放顏何秦冉鄭元范甯增

祀縣竄牧皮樂正子公都子萬章公孫丑又以諸葛亮尹焞魏了翁黃幹陳淳何基王柏趙復金履祥許謙陳澔羅欽順蔡清陸隴其並從祀乾隆三年復以吳澄從祀道光三年以湯斌從祀五年以黃道周從祀六年以陸贄呂坤從祀八年以孫奇逢從祀二十三年以文天祥從祀二十九年以謝良佐從祀咸豐元年以李綱從祀二  
年以韓琦從祀三年以公明儀從祀六年以公孫僑從祀八年以陸秀夫從祀十年以曹端從祀諸弟子追增始於唐總章元年而封公侯伯始於開元二十七年至明嘉靖九年盡去封號四配稱復聖宗聖述聖亞聖諸弟子均稱先賢左邱明以下均稱先儒崇禎十五年升左邱明邵雍張載程顥程頤朱熹七十子下進稱先賢

國朝康熙五十一年又升朱子於十哲乾隆三年升有子位十哲之次定爲十二哲位次稱謂始無遺議焉

按諸儒從祀固不可缺尤不宜濫其初雖從祀後經罷黜者蓋以苟况言性惡戴聖行猥鄙劉向喜神仙賈逵附會讖緯馬融貪鄙附勢何休黜周王魯王肅黨司馬氏王弼旨宗莊老杜預建短喪議揚雄爲莽大夫皆有愧聖學不得與諸儒比又朱彝尊孔子門人考載曾子門人十人子思據孔鮒樂正子春據鄭康成檀弓據陸德明沈猶行據趙歧公明宣據劉向陽膚據包咸公明高據趙歧公明儀據孔穎達子襄

據趙歧單居離據大戴禮註十人皆有根據除子思公明儀已經從祀外議者援孟  
子門人之例謂亦宜從祀附識於此

名宦祠祀

劉遂昌

許安石

劉仲洙

王源

梁驥

王瀛洲

侯鶴齡

魯之賢

陳來朝

趙焯

曾可毅

周射斗

符渭英

許來音

蔣洪澍

鄉賢祠祀

尙文

杜儒

劉素

王度

王琦

李人龍

王植

王模

陳設 名宦鄉賢  
各一案

爵三

簠一

簋一

籩二 棗栗

豆二 菁芹

羊一

豕一

鐙二

鑪一

尊一 有勻疏  
布幕

香槃一

丁祭畢教官詣各祠行一跪三叩首禮

按學宮內建先賢祠左祀賢牧右祀鄉賢者始明洪武戊申成化年間改稱名宦鄉賢祠

國朝順治九年定名宦鄉賢令各學官務須覈據非年久論定者不得舉雍正二年題准名宦鄉賢行令各省督撫學臣秉公詳察如果功績不愧名宦學行允協鄉評者將事實姓名送部仍准留祀

忠義孝悌祠祀

宋愈亨

王舉

王懷義

宋時化



袁 斌

杜廷棟

宋時正

節孝祠祀

高氏以下

氏 氏族詳載人物志

祭以每歲春秋仲月上戊日禮儀品物與名宦鄉賢同

雍正二年奉文各州縣建祠二一為忠義孝悌之祠建於學宮內祠門外立石碑一通將前後忠義孝悌之人刊刻姓氏於上已故者設牌位於祠中一為節孝之祠另擇地營建祠門外建大坊一座將前後節孝婦女標題姓氏於上已故者設牌位於祠中每年春秋二次致祭

祀典下

關帝廟

按 關帝仕漢為前將軍漢壽亭侯諡曰壯穆其靈跡至隋始顯宋崇甯元年封忠惠公後又封崇甯真君大觀三年封武安王淳熙十四年封英濟王元天歷元年封顯靈義勇武安英濟王明萬歷十八年封協天護國忠義帝四十二年封三界伏魔大帝神威遠振天尊 本朝疊加崇封曰

忠義神武靈佑仁勇威顯關聖大帝後又加封護國保民精誠綏靖等字咸豐二年升入

中祀每歲以春秋仲月上戊日五月十三日致祭雍正二年加

關帝

三代公爵供奉後殿咸豐五年追封王爵春秋仲月上戊日分獻官致祭惟五月十三日

無祭

前殿陳設品物禮儀均與 文廟同

祝文

維年月日謹以牲帛醴齊粢盛庶品之儀致祭於

關聖大帝之神曰惟

帝浩氣凌霄丹心貫日扶正統而彰信義威震九州完大節以篤忠貞名高三國

神明如在徧祠宇於寰區

靈佑丕昭薦馨香於歷代屢徵異績顯佑羣生恭值嘉辰遵行祀典筵陳籩豆几奠牲膠

尙

饗

前殿五月十三日陳設

帛一色白

爵三

鑪一

牛一組

羊一組

豕一組

品果五棗栗核桃  
荔枝龍眼

鏡二

尊一有勺  
布幕

香槃一

禮儀與戊祭同無祭文

後殿陳設

帛三

爵三

羊一組

豕一組

籩八

豆八

鏡二

鑪一

尊一

香槃一

祭日分獻官先詣行禮禮三獻二跪六叩首

祝文

維年月日謹以牲帛醴齊粢盛庶品之儀致祭於

光昭王

裕昌王

成忠王之神位前曰惟

王世澤貽麻靈源積慶德能昌後篤生神武之姿善則歸親宜享尊榮之報列名王之封爵錫命優隆合三世以肇禮典章明備恭逢陬吉祇事薦馨尙

饗

文昌宮

按史記天官書斗魁戴筐六星爲文昌周禮大宗伯以禋燎祀司中司命鄭注謂文昌官星月令季冬畢祀天之神祇鄭康成謂司中司命與焉文昌之祀自古已然今世俗乃謂文昌帝君姓張名亞子其先越雋人因報母讐居劍州之七里山仕晉戰沒人爲立廟唐天寶中封爲龍丞宋咸平中加封英顯王元明加號爲轉元開化文昌司祿宏仁帝君景泰五年勅賜文昌宮額學校祀之

國朝嘉慶六年奉文列入祀典咸豐六年升入中祀每歲春秋二仲月陬吉暨二月初三日聖誕致祭其禮儀祭品與 關帝廟同

祝文

維

神蹟著西樞宿環北極六筐麗曜協昌運之光華累代垂靈爲人文之主宰扶正久彰夫

感召薦馨宜致其尊崇茲屆仲春用昭時祝尙其歌格鑒此精虔尙

饗

後殿供奉陳設品物行禮儀注均與祭 關帝廟後殿同

祝文

竊惟祭引先河之義禮崇反本之思矧夫世德彌光賞鑒斯及祥鍾累代炯列宿之精靈化被千秋爲人文之主宰是尊後殿用答前麻茲值仲春肅將時事用申告潔

神其格歆尙

饗

社稷壇

陳設

祝板一 有架

爵三

籩四

豕一

尊一

有勺疏布幕

帛二 黑色

簠二 黍稷

豆四 韭菹鹿醢醢

鏡二

血豆一

簠二 梁稻

羊一

鑪一

祭以春秋仲月上戊日行三跪九叩首禮

祭文

維

神奠安九土粒食萬邦分五色以表封圻育三農而蕃稼穡恭承守土肅展明禋時屆仲

春秋敬備祀典庶丸丸松柏鞏磐石於無疆翼翼黍苗佐神倉於不匱尙

饗

按古者勾龍配社棄配稷明洪武十一年詔定王府社稷不設配自後惟京師太社稷有配位州縣皆無又按先儒以經文無北郊因謂社便是祭地然地與社不同山堂考索云地者后土之總稱社者地祇之屬而非即地所以地爲大祀社爲中祀祭地則用駢犧祭社則用太牢祭地則用七獻祭社則用三獻祭地以后稷配祭社以勾龍配王制言天子祭天地諸侯祭社稷地與社之不同明矣

風雲雷雨山川壇

禮部則例名神祇壇

帛用七色白無血豆餘與祭社稷壇同

祭文

維

神贊襄天澤福祐蒼黎佐靈化以流形生成永賴乘氣機而鼓盪溫肅攸宜磅礴高深長  
保安貞之吉憑依鞏固實資捍禦之功既民俗之殷盈仰神明之庇護恭修歲祀正  
值良辰敬潔豆籩祇陳牲幣尙

饗

按漢唐宋風雷雨各立壇以祭明洪武二年增祀雲合爲一壇六年又合山川共爲  
一壇八年又以城隍合祭於壇

國朝因之

先農壇

帛一色青無血豆祭用仲春亥日餘與社稷壇同

祭文

維

神肇興稼穡粒我蒸民頌思文之德克配彼天念率育之功陳常時夏茲當東作咸服先  
疇洪惟九五之尊歲舉四推之典恭膺守土敢忘勤勞謹奉彝章聿修祀事惟願五  
風十雨嘉祥恆沐於神庥九穗雙歧上瑞頻書夫大有尙

饗

耕藉禮

雍正五年部頒耕藉儀注各州縣擇東郊潔淨地四畝九分立爲藉田於藉田後建先農壇供奉神牌收貯祭器擇勤謹農夫二名免其差役酌給口糧令朝夕灑掃每歲耕藉之日祭先農壇朝服行禮畢各官俱更蟒袍主祭官秉耒佐貳執青箱播種耕時用耆老一人牽牛農夫二人扶犁俱照九卿之例九推九返農夫終畝耕畢率耆老農夫行望

闕三跪九叩首禮其農具俱用赤色牛用黑色箱用青色所盛籽種悉從各處土宜即着守壇農夫灌溉藉田地方官不時勸課至耕藉日期候部頒發一體舉行  
常雩禮

乾隆七年禮部議直省府州縣衛孟夏擇日行常雩禮於神祇壇或有亢旱七日一祈先祭界內山川次祭社稷不雨祈禱如初其或淫潦爲災則伐鼓用牲祭祭城門以祈晴霽

常雩合祭風雲雷雨山川社稷先農於壇陳設禮儀如春秋壇祀例無血豆不瘞毛血

祭文



維

神恭膺

詔命撫育羣黎仰體

彤廷保赤之誠勤農勸稼俯維蔀屋資生之本力穡服田令甲爰頒甫舉祈年之典惟寅

將事用申守土之忱黍稷惟馨尙冀明昭之受賜來牟率育庶俾豐裕於蓋藏尙

饗

旱雩風雲雷雨壇東山川壇西設明水三尊酒三爵粉養五器果五釘器皆用瓷羊一豕一

前一日示禁屠宰祭日長官五鼓率屬素服撤儀服迎水捧安神前上香讀祝行三

跪九叩首禮遣官分赴河神龍王東岳城隍各廟行香致禱次日清晨至壇拈香行

禮遣官分禱如前如是七日內雨澍吉服報謝不雨仍祈

祭祭城門前一日示禁屠宰祭日視來水最多處於城闔正中設神位長官率屬素服

撤儀從上香讀祝行三跪九叩首禮陳設如旱雩禮雨止報謝亦如之 凡祈雨祈

晴祝文取切時事無定式也

厲壇

春秋傳曰鬼有所歸乃不爲厲此祭厲壇之義也祭以每歲清明日七月望日十月

朔日印官率其屬禮服詣行兩跪六叩首禮

陳設

城隍神位前

祝板一有架

帛一色白

爵三

羹五器

羊一

豕一

鐙二

鑪一

香槃

紙馬一分

無祀鬼神前

東西各一案

爵三

菜三器

羊一

豕一同俎

米一石

鐙二

鑪一

紙楮一兩

金銀鏤十束

祭文

維年月日謹以牲帛醴齊黍稷之儀致祭於

城隍之神曰幽明異路守土維均命折殊名求食罔異維聰明正直而一有以作之鑒

觀庶蒸蒿悽愴之情無不極其情狀爰遵定制聿舉明禋凡斯無祀之魂俱屬有生

之類爲男爲女姓莫紀於宮商是故是新代何稽於子丑號風嘯雨斷子姓而疇依附草棲煙絕姻親其何託謹設壇於城北仰主祭於

尊神維茲

中元  
禁烟  
焚衣

之節敬備牲醴肅具飯羹統一境之幽魂索羣靈而大享鬼言歸也庶

幾望壇壝以知歸

神之格思尙其鑒馨香而來格尙

饗

城隍廟

每歲春秋仲月與風雲雷雨山川同壇致祭清明七月望日十月朔日並爲厲壇祭主在廟無專祀每月朔望謁廟行兩跪六叩首禮

按城隍之名不經見其祀亦莫詳其始先儒謂既有社不應復有城隍考唐張說祭荊州城隍文曰城隍是保庇庶是依則前代崇祀之意有在也宋以來其祠徧天下錫廟額頒封爵視晉唐較著然猶未列入祀典至明始有城隍之祀洪武二年封京都城隍爲承天監國司民昇福明靈王其餘府爲監察司民城隍威靈公州爲監察司民城隍靈佑侯縣爲監察司民城隍顯佑伯三年詔去封號止稱某府州縣城隍之神又令造木爲主去塑像在王國王親祭之在各府州縣守令主之我

朝春秋致祭合於神祇壇朔望則參之於廟其亦于彼于此之意歟若夫各指其人以實之有姓名有誕辰則附會不經入於二氏矣

### 馬神廟

按周官校人春祭馬祖天駟星也夏祭先牧始養馬者秋祭馬社始乘馬者冬祭馬步乃神之災害馬者隋用周制祭以四仲之月唐宋因之明洪武二年定以春秋二仲月甲戌庚日致祭五年並諸神爲一壇歲止春祭今祭以六月二十三日致祭用少牢行兩跪六叩首禮

### 八蜡廟

禮郊特牲天子大蜡八伊耆氏始爲蜡蜡也者索也歲十二月合聚萬物而索饗之也考蜡之神有八鄭康成謂一曰先嗇二曰司嗇三曰農四曰郵表畷五曰貓虎六曰坊七曰水庸八曰昆蟲列昆蟲合貓虎者昆蟲不爲物害亦其功非祭昆蟲乃祭主昆蟲者也

歲以春秋仲月上戊日致祭用少牢行一跪三叩首

### 劉猛將軍廟

按降靈錄神名承忠吳川人元末授指揮弱冠臨戎兵不血刃盜皆鼠竄適千里飛

蝗徧野揮劍追逐須臾蝗飛境外後國鼎革自沈於河有司奏請遂授猛將軍之號  
國朝雍正二年奉文建廟

歲以春秋仲月上戊日與八蜡廟同祭

土地祠

祭以春秋仲月上戊日用少牢行二跪六叩首禮

學規

宋大觀元年詔布周官八行八戒之法於學宮令所在鑿刻淳祐六年御書白鹿洞教條頒示各學及書院立石明洪武十三年頒示榜文於天下令儒學刻石於明倫堂之左謂之臥碑順治九年頒臥碑於明倫堂之左曉示生員永爲遵守

朝廷設立學校選取生員免其丁糧厚以廩膳設學院學道官以教之各衙門以禮相待全要養成賢才以供朝廷之用諸生當上報國恩下立人品所有條教開列於後

一生員之家父母賢智子當受教父母愚魯或有非爲者子既讀書明理當再三懇告使父母不陷於危亡

一生員立志當學爲忠臣清官書記所載忠清事蹟務宜互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不許輕入即有切己之事止許家人代告不許干與他人詞訟他人亦不許牽連生員作証

一爲學當尊敬先生若講說皆須誠心聽受如有未明從容再問毋妄行辨難爲師者亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

知縣范時秀刊石於明倫堂

康熙四十一年頒 御製訓飭士子文朔望傳集諸生至明倫堂宣講

國家建立學校原以興行教化作育人才典至渥也朕臨御以來隆重師儒加意庠序近復慎簡學使釐剔弊端務令風教修明賢才蔚起庶幾棧樸作人之意乃比年士習未端儒效罕著雖因內外臣工奉行未能盡善亦由諸爾生積錮已久卒難改易之故也茲特親製訓言再加警飭爾諸生其敬聽之從來學者先立品行次及文學學術事功原委有序爾諸生幼聞庭訓長列宮牆朝夕誦讀甯無講究必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化僑盜之氣文章歸於淳雅勿事浮華執度式於規繩最防蕩軼子衿佻達自昔所譏苟行止有虧雖讀書何益若夫宅心弗淑行已多愆或蜚語流言脅制官長或隱糧包訟出入公門或唆撥姦猾欺孤凌

弱或招呼朋類結社邀盟乃如之人名教不容鄉黨弗齒縱辛脫褫朴濫竊章縫返之於  
衷能無愧乎况復鄉會科名乃掄才大典關係尤鉅士子果有真才實學何患困不逢年  
顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利  
營私種種弊端深可痛恨且夫士子出身之始尤貴以正若茲厥初拜獻便已作姦犯科  
則異時敗檢踰閑何所不至又安望其秉公持正爲國家宣猷樹績膺後先疏附之選哉  
朕用嘉惠爾等故不禁反覆惓惓茲訓言頒到爾等務共體朕心恪遵明訓一切痛加改  
省爭自濯磨積行勤學以圖上進國家三年登造束帛弓旌不特爾身有榮即爾祖父亦  
增光寵矣逢時得志甯俟他求哉苦仍視爲具文玩愒勿做毀方濯冶暴棄自甘則是爾  
等冥頑無知終不能率教也既負栽培復干咎戾王章具在朕亦不能爲爾等寬矣自茲  
以往內而國學外而直省鄉校凡學臣師長皆有司鐸之責者並宜傳集諸生多方董勸  
以副朕懷否則職業勿修咎亦難道勿謂朕言之不豫也爾多士尙敬聽之哉

### 學額附

額設廩生二十名增廣生二十名附生無定數

歲貢三年一貢

新進童生順治十二年以前十名至十六名多寡不等至十六年科歲併考僅六名康



熙十年知縣許來音詳請廣爲八名另進府學一名康熙十五年新進僅二名二十  
年復額八名五十五年加至十名雍正三年奉文深澤以人文最盛之地小學改爲  
中學定額十五名

武童入學前俱附入大寧衛康熙四年改入州縣儒學十年以後額進八名雍正三年  
改爲中學定額十二名

乾隆七年奉文拔貢定例十二年題請舉行一次深澤例選拔一名  
凡鄉會試中式者均籍其名勒石立於學

禮制

萬壽聖節元旦冬至朝賀

先期敬赴公所陳設至日五鼓知縣率僚屬具朝服鼓三嚴禮書稟請行慶賀禮三跪九叩首禮畢坐班少頃退班惟元旦仍率僚屬同至

文廟暨各廟照朔望行禮畢回署受賀

恭迎

恩詔

知縣率僚屬具儀仗鼓樂至東門外跪接俟詔書過後由旁路先至儀門外跪接隨至公堂衆官依次排班齊樂作行三跪九叩首禮跪俟宣讀跪聽畢興復行三跪九叩首畢恭詣案前跪請 聖安使者鞠躬答曰安衆官乃退

迎春鞭春

立春前一日知縣率僚屬具朝服至東郊司事者豫造芒神塑土牛列於左右衆官齊集北向立行三跪九叩首禮退換公服升公座飲春酒樂作書役各執春花繞堂三市畢詣芒神前行一跪三叩首禮畢鼓樂前導迎芒神土牛回署位芒神於儀門左一揖而退次日立春時率僚屬具公服至芒神前行禮如前畢各執綵鞭環立土牛

兩旁率各官環繞擊土牛三市畢復位禮畢  
救護

凡日月食先設香案於公堂之露臺知縣率僚屬素服同至公堂俟初虧各官序立行  
三跪九叩首禮畢金鼓齊鳴各官起立俟食甚復圓皆行禮如初  
上任

上任之日各書役迎於東門外書役前導由東門入至儀門前禮書具牲醴稟請祭門  
行一跪三叩首禮畢稟請入署祭竈祭宅禮如前擇日拜印值日書吏捧印置於公  
案上具朝服聽事吏稟報吉時吏書稟請拜印離公座出印於箱吏書開印箱升印  
於箱上行三跪九叩首禮畢用印吏書用印訖入印於箱吏書封印訖設香案於堂  
之東北隅望闕謝恩行三跪九叩首禮畢退位吏書稟請升公座排衙書役人  
等以次參見然後同僚行相見禮乃押公文治理公事

開印

本縣遵於正月某日某時具朝服升堂開門升礮聽事吏稟報吉時吏書稟請拜印離  
公座恭詣印前出印於箱吏書出印升印於箱上行三跪九叩首禮畢復升公座吏  
書稟開印用印畢入印於箱吏書稟請簽公座簿刑書稟請排衙各書役叩賀畢鼓

樂導引送印入宅

封印

本縣遵於十二月某日某時具朝服升公座開門升礮聽事吏稟報吉時吏書稟請拜印離公座恭詣印前出印於箱書吏出印升印於箱上行三跪九叩首禮畢復升公座吏書稟用印用印畢稟封印入印於箱各書役叩賀畢鼓樂導引送印於宅

賓興

生員大比本縣擇期設公宴於公堂生員至本縣出迎揖讓升堂本縣主席學官及僚幕與焉宴畢本縣步送出頭門乘輿送至城門外揖別

鄉飲

每歲正月十五日十月初一日於儒學行鄉飲酒禮以正官爲主位東南以致仕官爲大賓位西北以年高有德者一二人爲僕賓位東北以次長爲介賓位西南以教官爲司正以老成生員贊禮前一日執事者於儒學講堂陳設坐次司正率執事習禮至日黎明執事者宰牲具饌主席及僚屬司正先詣學遣人速賓僕以下賓僕至出迎於庠門外揖入主居東賓僕居西三揖三讓而後入門至二門如前三揖三讓升階至堂前又三揖三讓而後升堂東西相向立贊兩拜訖就位執事者唱司正揚觶

執事者引司正由西階升詣堂中北向立唱賓僕以下皆立唱揖司正揖主賓皆揖  
執事者以觶酌酒授司正司正舉酒曰恭惟 朝廷率由舊章敦崇禮教舉行鄉飲  
非爲飲食凡我長幼各相勸勉爲臣盡忠爲子盡孝長幼有序兄友弟恭內睦宗族  
外和鄉里無或廢墜以忝所生讀罷執事者唱司正飲酒飲畢以觶授執事執事者  
唱揖司正賓僕皆揖司正復位賓僕以下皆坐唱讀律令執事者舉律令案於中堂  
唱賓主皆拱立讀者詣案北面立讀曰鄉飲之設所以尊高年尙有德興禮讓敢有  
誼譁失禮者許揚觶者以禮責之其或因而爭競者主席之人會衆罪之讀大誥曰  
鄉飲酒禮叙長幼論賢良別奸頑異罪人其坐席間高年有德者居於上高年淳篤  
者次之以次序齒而列其有曾違條犯法者不許干與善良之席違者罪以違制讀  
畢復位執事者唱供饌案執事者舉饌案至賓前次僕次介次主以次舉訖執事者  
唱獻賓主起席北面立執事酌酒以授主主受爵詣賓前置於席稍退贊兩拜賓答  
拜訖執事又酌酒以授主主受爵詣僕前置於席交拜如前儀畢主退復位執事唱  
賓酬主一如主獻禮賓復位贊唱飲酒供湯饌歌詩酒行歌童歌鹿鳴之首章再行  
歌南山之首章三行歌湛露之首章每酒一行供湯一次畢贊唱徹饌主賓以下皆起仍東西  
立贊唱賓謝主並兩拜訖下堂面東北隅望

闕謝

恩行三跪九叩禮主賓復指分東西行仍三指出屏門而退

讀法

每月朔望爲講約清晨於本城空闊處爲講所上供

聖諭牌香案一布椅兩旁設講案於中間置鄉約條規正官率僚屬紳衿里民齊集講所  
老成宣讀贊唱排班跪叩如式向案開講

聖諭十六條衆官紳衿里民恭肅聽受頒發鄉約全書於各鄉堡齊集居民在約所逐條  
講解并讀律令

明會典縣設本鐸老人八人每月朔望宣講上諭一孝順父母一尊敬長上一和睦鄉  
里一教訓子孫一各安生理一毋作非爲

學政全書 本朝順治九年頒行六諭於各直省十六年覆准古來設立鄉約申明六  
諭原以開導愚蒙從前屢行申飭恐有司視爲故事應嚴行各直省地方牧民之官  
與父老子弟實行講究其鄉約正副不應以土豪僕隸奸胥蠹役充數應會合鄉人  
公舉六十以上經告衣頂行履無過德業素著生員若無生員即以素有德望六七  
十歲以上平民統攝每遇朔望申明六諭並旌別善惡實行登記簿冊使之共相鼓

舞

康熙九年頒發

聖諭十六條

- 一敦孝弟以重人倫
- 一和鄉里以息爭訟
- 一尚節儉以足財用
- 一黜異端以崇正學
- 一明禮讓以厚風俗
- 一訓子弟以禁非為
- 一誠窩逃以免株連
- 一聯保甲以弭盜賊
- 一篤宗族以昭雍睦
- 一重農桑以足衣食
- 一隆學校以端士習
- 一讀法律以儆愚頑
- 一務本業以定民志
- 一息誣告以全善良
- 一完錢糧以省催科
- 一解讐忿以重身命

雍正二年

御製

聖諭廣訓萬言頒發直省宣講

雍正七年部咨各省督撫令各州縣於大鄉大村人居稠密之處俱設立講約之所於

舉貢生員內揀選老成有學行者一人以爲約正再選樸實謹守者三四人以爲值月每月朔日齊集鄉之耆老里長及讀書之人宣讀

聖諭廣訓闡明大義詳示開導務使鄉曲愚民鼓舞向善內開讀約禮儀凡州縣城內及各大鄉村各設講約之所每月朔日豫約同鄉之人夙興各食於其家先後集於講約之所俟約正及耆老里長皆至相對三揖衆以齒分左右設立几案於庭中值月向案北面先讀

聖諭廣訓皆抗聲宣讀使鵠立悚聽然後約正推說其說剴切叮嚀使人警悟通曉未達者仍許其質問至約正值月果能化導督率一鄉之中向化者多犯法者少行之三年著有成效該縣申報於府由府而司道司道核實轉申督撫學臣督撫學臣擇其學行全優者具題送部引

見其誠實無過者亦應量加獎異以示鼓勵其或不能董率怠惰廢弛者該地方官申詳督撫學臣卽加黜罰更選擇代換之人如地方官有視鄉約爲具文不實心奉行者聽該督撫據實參處





歲時

正月元日晨興先期設香案於庭至旦拜神祀先畢徧拜尊親師長或以酒肉相餉曰拜節禮三四日乃止門前立高竿懸輕羽於上謂之占風元宵張燈于門結烟花架火樹銀花前後三日男女羣遊俗曰散百病二十一日祀城隍是月也農于耜

二月一日祀文昌二日煮秫爲糜麩調之爲醋質曰醋醪以灰撒墻壁下如縷由室內達戶外曰引醋用辟蝎毒又用麥豆麵合汁作煎餅謂可薰虫是月也冰泮草生農舉趾

三月寒食日士女祭墓標紙錢增新土清明日士女簪柳爲鞦韆戲時桃李李花俱開挈榼具就樹下酌酒曰尋芳是月也麥始生木始花桑可蠶

四月三日記真武八日有浮屠會十四日記呂仙是月也農鋤地蠶繭登

五月端午饅角黍相餉飲雄黃蒲酒簪艾葉繫朱符以辟兵兒童皆腕繫綵線名百歲繡城中人多遊郊外就橋柳爲飲謂之插柳十三日記關帝是月也婦治絲男刈麥

六月六日儲水造麩伏日造醬十二日祭龍母用紙作小旗插田邊謂田祖至謂之迎豐是月也黍始登

七月七日夕女子星下陳瓜果祀織女曰乞巧十五日祭墓是月也穀始登

八月十五日設香案迎月出陳瓜餅設酒筵玩月是月也木棉始登婦紡績

九月重陽作花糕用糖栗棗澆麵及酒穀相餉登高賞菊釀黍爲酒潔犧牲作樂報方社有中古遺風焉是月也禾悉登

十月一日掃墓與寒食同剪紙爲衣焚塚上曰獻衣時好集客號曰試酒以多醉者爲榮是月也實倉廩工夜作

十一月冬至日祀先拜尊長如元旦儀是月也風曆發獵雉兔

十二月八日以五穀雜棗栗等合而熟之曰臘八粥貧乞無忌者童男髡髮童女黔耳二十四日掃室祭竈除夕易門神桃符貼春聯祀先門置穀稽一束燃之曰燎星長幼宴集謂之守歲放爆竹以除崇聲聞遠近至於達旦是月也氣栗烈閉戶守冬

風俗

一俗尚儉約衣食惟蔬布卽薦紳家亦無侈靡綺麗之風雖中微終襲書香故庠士兼耕讀不云勞居闔閭而操奇贏終非所長

一民俗終歲勤苦間以廟會爲樂演戲召親如正月二十五日三月二十三日四月二十八日有神進駕雜扮陋習至茶房酒肆連棚如市賭博啓釁或掏摸生奸所宜嚴行禁戢杜靡耗而絕盜萌

一民俗重農不能商賈鬻財於外者少故邑鮮狙獪惟南關遠人輻輳五方雜處所宜訪察商人利弊驅遊棍緝小俚庶市無奸宄焉

一俗多樸魯乃黨競刁悍亦有其人平時力作勤苦計利悉於錙銖少有憤激輒興詞訟而刀筆訟師奸惡猾豪因以乘機播弄樂人有事而收其利在守土者息訟安民委曲勸化懲刁奸以扶善良

一地窄而瘠又邇沙濬漣沱三河每際淹溺民貧或以生盜且咫尺卽係隔屬荏苒出沒最易勾引肆害所宜嚴清牌甲聯絡村莊有警聞聲應援盜至則擒庶幾枚甯

一民俗重氣誼喜相周至每際吉凶事一二親朋倡義樂助或訂日設酒饗送分金通財合歡甚盛舉也迨沿習日久藉名網利如婚娶生子徙宅祝喜等事分刺數百強

壓橫攤遂變通財之義爲打網之名宜行禁戢以拯其弊

俗禮

一婚姻之禮先重媒妁男家請親友作冰人往女家求婚女家許婚二家各索男女生庚令術家推算合婚男家擇吉通以書啟或有略備幣帛簪珥之儀者女家亦擇吉答書將親迎男家先期擇吉陳聘儀於女家曰完婚禮女家亦先親迎一二日送粧奩於男家曰鋪牀婿家擇吉行親迎禮婿味爽往新婦家不見新婦拜岳父父母其贊用雁或以蒼鷺代俗多用雞即家禮奠雁義也岳家具酒餼款婿畢新婦登車後行導以鼓吹又以器實酒餼麥麩棗栗石子置輿內新婦至使抱進義取發夫蚤立子且多男也女子于歸之前夕親屬皆酌以酒曰送行新婦蒙以紅錦曰蓋頭避凶煞也由閣門至輿所皆藉以氈氍義取不履平地平與貧音近也新婦升輿下輿皆令陰陽家擇坐向以趨吉到婿家所歷地亦藉氈氍柱碣石臺皆剪紅紙貼其上曰避白虎也內庭置香几新婦入門方成粧加髻取總角夫妻之義與夫同拜天地隨拜祖先畢乃謁見翁姑陳衣服巾履爲贄是日親友皆來賀至戚餽物食曰輓俗云下車飯翼日拜伯嫂及伯叔翁姑皆以巾履贄婿於是日抵新婦家拜其岳父母曰謝親三日新婦之外祖家賀新婿以鮮豬喜酒曰啟帳新婦之父母家亦邀女眷備蒸食魚肉送婿家曰送飯至六日岳父母請婿及女歸家曰住六有九日請者曰住九

元宵岳父母憐女之思家延女及婿乃謂三年內新婦不看婆家燈也二月二日女家具食物送女歸婿家或至寒食送回上墳作鞋足其家人所著名遍家鞋重陽日女家邀女眷用糖栗棗和麪作花糕大尺餘送婿家謂之追花糕雖貧富繁簡不同然大概如是則俗禮猶古禮遺意也

一喪葬之禮父母疾危篤移牀外庭子孫兄弟環侍既屬續遷於中堂易衣服衾褥納金珠口中即禮飯含義也氣絕孝子孝婦等環哭以白布作枕枕之銳其兩頭實以麥麩名雞鳴枕俗謂冥途不知分曉耳畔得聞雞鳴也蒙面以帛縈足以絲即禮綴足義也命僕者環戶揮扇防尸變也按死者歲數每歲白紙一張每紙剪爲三連其末條接下垂以竿繫門外名門旛男門左女門右孝子徒跣孝婦蓬頭夕孝子以楮錢及水漿香供至土地祠焚拜哭而歸名倒頭錢又名還魂錢望魂之復還也俗誤曰黃昏錢如是者三日大歛罷靈案燒長明蓋晝夜不息又蒸乾飯一盂揉麥麵數條如捧置案上將大歛以麵條納死者袖中盛飯以盞瓶俟葬納諸壙中或亦葬儀筓簪蓮鰓之義也死之第二日夜半紙作轎馬及僕從門外燒之俗謂送行隨焚其所樹門旛僅存少許置門框上殯出然後焚之雞始鳴即大歛以綿蘸水拭死者面又以金簪珥磨水畫死者目俗謂開光明闔棺以陰陽生贊禮拜哭黎明孝子以下

成服設靈幃樹銘旌幃外作紙童男女各一及喪花雪柳諸物又以別案設生時衣服器玩廳外結靈棚迎門以帛紙表喪旁書生死年月日時訃至親以帖揭於門外曰開弔俗未歛三日內有門外招替人說評話者有架臺演戲者名伴宿然紳士家多不用自父母始死至五七皆日三時上食哭奠孝子寢苦枕塊戒葷酒宿靈次俗每逢七日必豐其供饌或有延僧道爲齋懺者然紳士家多不爲旣窆葬開塋穿壙亦揭於門外曰某日發引復聞於戚屬來祭奠賻祭畢留客於別舍設酒饌孝子等奉帛布拜獻及葬日以陰陽生贊禮出殯陰陽以刀斷桑枝於門限碎碗名斷喪殯出戶孝子以陶器盛諸菓菜傾擲於石名摔獻憾不得更獻於親也俗皆以瓦碎於石味其義矣殯旣行孝子執旛前導書某考某妣名引魂旛期功之屬皆同孝子哭送孝婦從柩後諸戚女婦從諸戚設帳幕酒果奠於路名路祭疏親戚郊外歸餘抵墓隨路散楮錢名買路錢爲冥器方相旛仗等及墓祀后土請尊貴點主旣葬奉主耐廟三日詣墓所奠哭焚喪服增封土名圓墳小祥大祥皆詣墓奠哭禫卜日而祭俗多不行但易淡色衣以示即吉之義終三月詣墓奠哭乃即吉嗚呼孝稱無違禮重送死俗禮非殊於古制然喪具稱家惟人自盡耳獨怪世俗重女凡父母喪棺槨衣衾厚薄必請命於女母之喪凡母所遺者女皆有之加以母黨之伯叔兄弟要索



服帛互相鬪鬩遭喪者不違即位哭妻喪子媳喪亦然至逼用浮屠或搬演雜劇皆乖禮教所當重爲禁革者也

深澤縣志卷之五

食貨志

上有體國經野之政下有任土作貢之誼况近在畿輔呼吸可通生聚休息

朝廷之恩也則急公奉上詎非小民之職哉顧深澤以彈丸邑當滹滋衝所產之民之物不過如此向者田賦畝以五分有半計較他邑獨重自均攤丁匠之後溢於舊額者又八百二十餘金而民力維艱矣莅斯邑者上之臚陳民瘼爲民請命次則考其端委而寓撫字於催科焉豈徒按籍以求哉志食貨

丁匠源流

原額人丁二萬三千六百一十丁內除節年編審逃亡優免本身丁照例免徵外實在行差人丁二萬三百八十丁撤免供丁五百七十二丁吏承丁一十八丁實在二萬九百七十丁

順治十八年至康熙五十年十二次編審增入八百八十六丁合原額共二萬一千八百五十六丁每丁徵銀一錢共徵銀二千一百八十五兩六錢

額外人丁

順治十八年定州衛歸并本縣屯丁五百二十九丁

康熙十年至五十年九次編審增入新丁五百八十丁

通計共二萬二千四百三十六丁各徵銀不等共徵銀二千二百六十八兩八錢  
康熙五十五年至雍正九年四次編審新增五百七十一丁康熙五十二年奉文俱爲  
盛世滋生人丁但造冊報部永不加賦

工部班匠二十五名每名徵銀四錢五分共銀一十一兩二錢五分脚價銀九分  
以上丁匠銀自雍正二年爲始攤入額內額外地糧銀內徵收訖

田賦

原額民地二千七百頃五十二畝四分一厘五毫每畝徵銀五分四厘四毫八忽九微  
七纖四塵四塵三渺共征銀一萬四千六百九十三兩二錢七分三厘八毫六絲五  
忽七微九纖五沙七塵六埃九渺八漠五虛

額外清出自首民熟地二頃七十三畝四分四厘七毫每畝征銀五分四厘四毫八忽  
九微七纖四塵四埃三渺共徵銀一十四兩八錢七分七厘九毫六絲九忽七微四  
纖七塵二埃七渺三湖一虛

歸併定州衛備荒地二十三頃三十八畝七分八厘每畝徵銀一分共徵銀二十三兩  
三錢八分七厘八毫

節年開懇荒地五十六頃三十八畝八分五厘五毫每畝徵銀三分共徵銀一百六十九兩一錢六分五厘六毫五絲

買回原撥安州定州衛坐落本縣軍地二十八頃七十二畝五分五厘三毫每畝徵銀三分共徵銀八十六兩一錢七分六厘五毫九絲

又本縣學田地二十三畝八分每畝徵銀三分共徵銀七錢一分四厘

又上荒地二十六畝八分每畝徵銀三分共徵銀八錢四厘

又上荒地二頃四畝每畝徵銀三分共徵銀六兩一錢二分

又馬廠地三十畝一分每畝徵銀三分共銀九錢三厘

撥補代徵安州地四百八十六頃七十畝五分七厘三毫每畝徵銀一分六厘二毫三絲一忽九微一纖一沙九塵六埃共徵銀七百九十兩一分六厘四毫五絲五忽九微七纖八沙七塵五埃三渺八湖

以上各項共地三千三百一頃三十一畝三分二厘三毫每畝徵銀不等共徵銀一萬五千七百八十五兩四錢三分九厘每兩均攤丁匠銀二錢七厘二絲六忽八微一纖九沙二塵八埃二渺七漠三湖共攤丁匠銀三千二百六十八兩九厘每畝徵閏月不等共徵閏月銀六百一十兩九錢八分二厘每兩均攤丁閏銀七

厘九毫四絲一忽一微七纖八沙五塵八埃二渺一漠二虛七澄四清共攤丁閏銀一百二十五兩三錢五分五厘

通共徵正併均攤丁匠丁閏共銀一萬九千七百八十九兩七錢八分五厘

按丁匠銀兩均攤地糧之內所以恤無業窮民而抑富民之兼并法至良也但縣地糧輕重不同人丁多寡亦異以本縣丁匠仍均於本縣更爲均平深澤田賦則例原重於他縣今總計丁匠銀兩共二千二百八十兩一錢四分均攤銀兩則三千二百六十八兩九厘較多於舊額九百八十餘兩是賦之重者愈重矣據情籲請民艱其可慰乎

留支

知縣俸銀四十五兩

門子二名工食銀一十二兩遇閏加銀一兩

皂隸十六名工食銀九十六兩閏銀八兩內二名給伴作工食

民壯二十五名工食銀一百五十兩閏銀十二兩五錢

馬快八名工食銀一百三十四兩四錢閏銀十一兩二錢

禁卒八名工食銀四十八兩閏銀四兩

轎傘扇夫七名工食銀四十二兩閏銀三兩五錢

庫子四名工食銀二十四兩閏銀二兩

斗級四名工食銀二十四兩閏銀二兩

典史俸銀三十一兩五錢二分

門子一名工食銀六兩閏銀五錢

皂隸四名工食銀二十四兩閏銀二兩

馬夫一名工食銀六兩閏銀五錢

教諭俸銀四十兩

訓導俸銀四十兩

齋夫三名工食銀三十六兩閏銀三兩

膳夫二名工食銀一十二兩三錢三分三厘閏銀一兩一錢一分一厘一毫

廩生二十名月糧銀六十四兩閏銀五兩三錢三分三厘

門斗二名工食銀一十四兩四錢閏銀一兩二錢

修理 龍亭銀五錢

修理 文廟銀十兩

文廟崇聖祠名宦鄉賢春秋二祭銀四十兩

社稷山川風雲雷雨城隍馬神八蜡等神春秋二祭三十兩

關帝三祭銀四十兩

文昌祭銀二十六兩六錢六分六厘

三小祭無祀鬼神銀十兩

鄉飲二次酒席銀十兩

農夫二名工食銀一十二兩閏銀一兩

遞馬四匹草料銀四十六兩四錢四分閏銀三兩八錢七分

吹手四名工食銀二十四兩間銀二兩

鋪兵十二名工食銀二十八兩八錢

更夫五名工食銀二十四兩間銀二兩

火夫十名工食銀四十八兩間銀四兩

孤貧二十八名口月糧銀一百兩八錢間銀六兩

孤貧冬衣布花銀七兩

時憲書銀三兩

二年一辦貢生盤費銀二兩五錢

文舉進士牌坊銀六十兩

武舉進士牌坊銀十兩以上二項均解司

按以上留支項下共支銀一千五百三十六兩七錢三分三厘而歷年奉裁官俸役食驛遞工料等項共銀二千七百八十五兩八錢八分八厘九毫一絲夫裁減者一時之宜 恩復則將來之望裁項中如縣令各官固有紉於巧婦之炊舉貢生監亦有須於激勸之權至於胥吏授精更難以枵腹而効急公之誼刀筆而責茹蘖之操是在當國者斟酌損益以求合乎時宜固不僅區區一縣所關也





養廉

知縣養廉銀六百兩咸豐六年奉文減給一成實應支九成銀五百七十一兩五錢二分

典史養廉銀三十一兩五錢二分

倉儲

常平倉原存穀共二萬九百七十石七斗五升八合雍正九年奉文減糶穀二千九十七石雍正十年奉文除本縣係小治應貯穀一萬石其餘俱糶價起解現應貯穀一萬石

義倉共存穀一千二百六十三石九升二合道光六年勸捐穀五百十三石七斗在大堡鐵千西河趙八莊西故羅五鄉義倉分貯

遞馬

深澤原額遞馬十二匹工料銀二百四十兩屢年裁減現今存馬四匹支工料銀四十六兩四錢四分

雜稅

戶部項下各稅俱無定額例應儘收儘解深澤每歲解銀一百八十餘兩

鹽課

原額官鹽二千四百引順治十四年詳減六百引止存一千八百引係三引二鹽康熙  
二年奉文加二千引共三千八百引係一引一鹽康熙十六年續增至四千八百三  
十二引分認京引二百一十三引

後歷年奉裁現行引三千三百四十八引  
課項該商在天津完納不由本縣徵解



物產

穀類

粟 穀有桴曰粟李時珍曰粟卽粱也周禮地官注北方水土深厚窖地而藏可數十年不壞其類最多其色有青紅黃白其稱名殆以百計焉

黍 職方氏冀州其穀宜黍稷爾雅翼黍有赤黍黑黍黏者則名秫可以釀酒

稷 本草稷卽糝一名粢朱子詩傳稷似黍而小靈壽志云粢稷粟正是一物而本草

稷米在下品粟米在中品又似二物嘗合而觀之黍貴而稷賤黍早而稷晚黍大而稷小黍穗散稷穗聚稷卽粟也今俗所謂小米者稷也所謂黃米者黍也黍有黏不黏二種不黏者飯黍也黏者釀酒之黍也其辨甚明自土人以飯黍爲稷黍稷遂淆麥 芒穀也夏小正註黍稷自神農以來有之麥則自后稷始別識而樹藝之詩曰貽我來牟廣雅云牟爲大麥來爲小麥按小麥秋種夏熟具四時之氣春種者曰春麥大麥有二種又俗名錯麥

豆 淮南天文訓北方其地宜菽爾雅翼菽者衆豆之總名也按豆種最繁有綠豆赤豆黃豆青豆白豆黑豆烏豆豇豆豌豆之別深邑皆有之

蜀秫 紅白二種博物志云地節三年種蜀黍卽此羣芳譜蜀黍一名高粱一名蜀秫



一名蘆稜一名蘆粟一名木稷一名荻梁以種來自蜀形類黍稷故有諸名  
蕎麥 一名烏麥粒似黑牽牛子有三稜故俗名稜子

脂麻 即油麻有黑白二種禮月令食麻與犬黃帝素問麻麥稷黍豆爲五穀

蔬類

白菜 一名菘埤雅菘性隆冬不凋四時長見有松之操故名菘

芹 爾雅曰楚葵按芹有水芹園芹野芹之分水芹一名水英園芹即旱芹邑園圃多  
植之

芥 通志一名辣菜有紫白青油數種

擘藍 廣羣芳譜南方謂之芥藍葉可擘食故北人謂之擘藍

蔓菁 一名蕪菁爾雅翼蔓菁南北通有之北土種之尤多

韭 爾雅葷山韭埤雅韭之美在黃

蘿蔔 爾雅作盧菹讀羅胎讀服農書北人蘿蔔一種四名春曰破地錐夏曰夏生

秋曰蘿蔔冬曰土酥廣羣芳譜一名萊菔一名紫花菘北土尤多有長圓二種紅白

紫三色紅者俗又名胡蘿蔔

菠菜 一名菠薐劉禹錫嘉話錄云菠薐來自西國云

是頗陵國所出故訛爲蒞穰俗呼爲青菜

山藥 薯蕷也嵇含草木狀一名山藷

番薯 一名紅藷紫皮白肉亦有黃肉者更有內外皆白色者閩人呼爲地瓜俗名紅

### 山藥

葫蘆 一名瓠蘆亦作壺蘆可挹可食靈壽志即瓠之圓大者

瓠子 埤雅長而瘦上曰匏短頸大腹曰瓠靈壽志南方謂之地蒲

同蒿 一名蓬蒿函史物性志作茆蒿

蒿苳 續博物志蒿菜出蒿國有毒百蟲不敢近

蒼蓬 一名蒸菜

金針菜 一名黃花菜

藕 爾雅釋草荷芙蕖其根藕

莧菜 詢葛錄北人呼苕莧音之誤也有紅莧白莧之分又有馬齒莧俗名馬生菜多

野生不入園蔬

茄 一名落蘇有紫白二種水茄宜生食

芫荽 一名胡荽京都謂之香菜

葱 本草外直中空有葱通之象能和五味古稱為菜伯

蒜 古今注卵蒜也爾雅翼大蒜為胡小蒜為蒜

茶 俗名曲曲菜野生不入園蔬

藁香 本草註北人呼為小茴香畿輔志一名八月珠

秦椒 廣羣芳譜以產秦地故名種類最繁

苜蓿 本草一名牧宿謂其宿根自生可飼牛馬也嫩時可食

東瓜 廣雅名圯芝本草此瓜經霜後皮土白如粉塗又名曰冬瓜

西瓜 本草凡瓜堪作果者惟此最美

南瓜 亦名倭瓜可為蔬并可飽貧人以代飯邑人呼為北瓜又一種形類而色白呼

為南瓜

王瓜 月令註草挈也

菜瓜 本草亦名越瓜

絲瓜 本草一名布瓜一名囊瓜俗名天絡

甜瓜 學圃餘疏甜瓜以香而小者為美邑中產者多劣

果類

桃 羣芳譜巨核桃霜下始熟出常山夏小正註小桃爲梅實皆自隕不可食

李 陸士衡果賦中山之縹李埤雅李性難老雖枝枯子亦不細其品處桃上

杏 格物叢話杏實味香於梅而酸不及核與肉自相離

梨 唐書地理志常山土貢梨陶宏景別錄梨性冷利多食損人謂之快果

杜梨 鄭康成詩註北人謂之杜梨南人謂之棠梨

棗 爾雅棘實謂之棗埤雅大者棗小者棘

石榴 博物志張騫使西域還得安石榴胡桃葡萄古今註石榴一名丹若

沙果 畿輔舊志綿而沙者曰沙果

葡萄 漢書作蒲桃有綠紫白三種

藥類

車前 即芣苢爾雅翼幽并謂之牛舌草

益母草 即茺蔚也爾雅註菴爲茺蔚又名益母

苘藨 本草經冬不死因舊苗而生故名回陳

夏枯草 本草苗高一二尺莖端作穗入夏則枯故名夏枯

牽牛 一名金鈴一名狗耳有黑白二種又名黑丑白丑

大薊 本草綱目薊者髻也其花如髻也

小薊 本草一名千針草俗名青刺薊

兔絲子 一名女蘿

蒲公英 正定志葉如萵苣花如單瓣菊

槐角 即槐實深邑處處有之

艾 蕭也急就篇一名水臺一名醫草

紫花地丁 本草釋名羊角子通志一名箭頭草

### 花類

海棠 羣芳譜海棠凡四種貼梗垂絲西府木瓜皆木本

秋海棠 羣芳譜一名八月春有二種葉下紅筋者常品綠筋者有雅趣

芍藥 羣芳譜一名將離又名婪尾春

玉簪 羣芳譜一名季女一名白鶴仙

蜀葵 古今註一名茈苳花叢生色有紅紫粉白數種

石竹 一名石菊又名洛陽花色以數十種計

鳳仙 羣芳譜一名海薊一名旱珍珠一名小桃紅一名染指甲有紅白紫碧數色

雞冠 羣芳譜有掃箒扇面纓絡鴛鴦諸名又一種五色壽星雞冠

月季 羣芳譜一名勝春俗呼月月紅

老少年 一名雁來紅

金銀藤 木草忍冬一名金銀花藤左纏

江西臘 正定志似菊而小先菊而開花各色碧藍一種菊所未有

蓼花 畿輔舊志高者丈許俗名水葑花

菊 正定志花類殆以百計自乾隆十五年前令高葑於登萊海外移得郡人遂廣其

傳

萱花 說文萱忘憂草也一名宜男

玫瑰 羣芳譜一名徘徊嬌豔芬馥有色有香可佩可食

木類

桑 爾雅疏桑樹一半有實一半無實者爲椹桑小而條長者爲女桑女桑一名栲桑

柏 六書精蘊柏陰木也木皆屬陽而柏向陰指西蓋木之有貞德者邑人於墟墓間

多植之

槐 爾雅穰槐大葉而黑守宮槐葉晝聶宵炕疏云聶合也炕張也又一種名龍爪槐

邑中不多見

椿 羣芳譜一作樵一作純今俗名香椿又名靈椿芽可食

榆 本草榆有莢榆白榆刺榆棚榆莢榆白榆皆大榆也白者名粉未生葉時枝條間

先生榆莢形似錢而小俗呼榆錢可食亦可釀酒

楊 古今註白楊葉圓青楊葉長又有赤楊霜降則葉赤材理亦赤

柳 埤雅柔脆易生與楊同類縱橫顛倒植之皆生又一種名垂柳枝皆下垂

樽 木草樽樽二樹形相似北人呼樽為山椿其葉臭惡歎年人亦食之

杜 甘棠也赤者為杜白者為棠

草類

蘆 丹鉛錄北人以水旁下濕處生者為葦其細不及指人家園池間所植者為蘆其

幹差大

葦 丹鉛錄蘆葦通一物

荻 廣羣芳譜荻似葦而細高數尺中實

蒿 禮月令註蒿亦蓬蕭之屬

莠 國語註莠草似稷而無實

茅 字彙茅類甚多苗出地曰茅針花曰秀葉曰菅根曰茹

禽類

雞 知時畜也玉篇司晨鳥

鵝 本草鵝有蒼白二色養之能辟蟲虺

鴨 野鴨爲鳧家鴨爲鶩禽經鳧能高飛而鴨舒緩故曰舒鳧

鴿 陸佃曰鴿性喜合凡鳥雄乘雌惟鴿雌乘雄逐月有子又名鴿鴿

燕 又名鷗鷗莊子鳥莫智於鷗鷗

家雀 說文依人小鳥也古今註雀一名家賓

鵲 喜鵲也一名軋鵲一名鵲鵲

鴉 烏別名廣雅純黑反哺者謂之烏小而腹下白不反哺者謂之鴉

布穀 爾雅謂即鳴鳩後漢書註布穀一名戴維一名戴勝

鷓鴣 夏小正田鼠化爲鷓註鷓鴣也

獸類

牛 周禮職方氏冀州其畜宜牛羊

馬 左傳冀之北土馬之所生



騾 本作羸說文驢父馬母正字通驢力在髀騾力在腰乘者隨其力進退之

羊 淮南天文訓北方其地多牛羊

豕 爾雅註豕今名豨江東通呼豨其子名猪躄皆白者名豨高五尺者名豨牝者名

豨 豨疏云北燕朝鮮之間謂之豨吳揚謂之豨

犬 曲禮大者為犬小者為狗

貓 狸屬一名烏員

驢 正字通驢有褐白黑三色以午及五更初而鳴協漏刻

兔 古今註兔有九孔言善遁也

蟲類

絡緯 古今註莎雞亦名絡緯以其聲如紡績織緯也帝京景物略絡緯便腹青色以

股躍以短翼鳴其聲聒聒以其聲名之曰聒聒兒邑人呼為驢駒

蟋蟀 古今註蟋蟀亦名蛩詩疏似蝗而小黑如漆有角翅楚人謂之王孫幽州謂之

趣織

蜻蛉 正定志一名蜻蛉好擊水而飛見則多水

蚯蚓 本草註蚓之行也引而後伸其壤如邱故名蚯蚓俗呼為曲蛇

蜂 畿輔舊志有土蜂蜜蜂馬蜂之別

蟬 正定志采具者良蜩聲大而色黑者蟬蜩別名蚺蜩諺曰蚺蜩聲狂禾稻生芒鳴

以五月也其七月鳴者曰寒蟬亦名寒螿似蟬而小青赤色又小而紫者曰螻蛄

蜘蛛 爾雅註齊人呼爲社公亦言網公又詩曰蠨蛸在戶亦蜘蛛也

蝶 說文本作蜨俗作蝶亦曰野蛾大者名鳳車莊子至樂篇烏足之根爲螻蛄其葉

爲蝴蝶埤雅嘗見園蔬其葉有爲蝶者三分二已蝶矣其一尙葉也

蟲 爾雅註蟲蟲一名蠻疏曰蝗子也畿輔舊志俗呼螞蚱

螽斯 詩經註長身而青長角長股五月以兩股相切作聲

螻蛄 爾雅翼今人謂之土狗北方謂之地螻

螻蛄 爾雅蝓螻蛄黑甲翅在甲下喜取糞而轉之

螻蛄 畿輔舊志俗呼刀郎

蜥蜴 說文在草曰蜥蜴在壁曰蜥蜴又名守宮俗謂之蝎虎

蛇 酉陽雜俎蛇有水草土木四種

蠶 長尾爲蠶短尾爲蠹癸辛雜識北方火蠹比之常蠹極小其毒甚酷

蚊 說文本作蠹亦作蠹從昏從蟲以昏時出也

蠅 有金蒼麻三種墀雅青蠅亂色蒼蠅亂聲

蠓 亦作蟻大者曰蚰蟥俗呼爲米羊

貨類

棉花 正定志本作綿一名白疊一名古終有草木二種其種本出南番今則徧及南

北按木棉惟交廣有之北地惟草本亦有紫色者又一種絲細而長俗呼爲絨花

麻 通志雄者爲臬雌者爲苴有縻麻火麻又有線麻黃麻

布 釋名布布也布列衆縷爲經以緯橫成之也荔青軒云禹貢厥篚織貝蓋織棉成

布與織文上承絲臬者有別非錦名也

葛帛 以麻暨蜀黍麵打糊爲之俗名爲葛帛

深澤縣志卷之六

識官志

古列侯所食縣謂之國縣令猶侯稱耳漢重循良每縣令而擢卿輔澤爲漢縣久矣然晉以前官是土者無復可問唐宋金元宦蹟一二著而已迄前明以至於今奏最軒舉者姓氏皆可考焉歷登篇中蓋猶司馬氏列侯年表之例乎若佐尉若司教或存或裁或裁而復要皆任有所專職無容曠君子因人考事鑑厥得失其亦顧名思義以勵官方也哉志職官

知縣

唐

劉遂昌

開元十八年任有傳

宋

許安石

元祐二年任有傳

張克敬

崇甯二年任有傳

金

劉仲洙

宛平人進士大定間任有傳

元

劉章甫 易州人至元元年任

毛景謙 至順二年任有傳

康里安安 至正間達魯花赤

崔讓 至正間任有傳

岳難公 烏孫人至正間達魯花赤有傳

趙公

按元有達魯花赤之官蓋監縣者也今明倫堂有故元石碣稱承德佐郎其秩之崇

卑可知

明

閔毅 洪武四年任

顧成 武一作誠洪武九年任

姚思誠 洪武十七年任

李珪 洪武二十年任

王源 龍巖人永樂十四年任有傳

陳通 寶雞人

宋祐

高文 瀏陽人正統間任有傳

陸通 景泰間任

楊濟 寶雞人

曹慶 涇陽人

王榮 武定州人

王佐 大同人

任賓 臨清州人

丁繼宗 鄆陵人

吳啓 江陰人舉人

李斌 陽曲人舉人成化八年任

李仁 曹縣人舉人成化十四年任

梁驥 咸甯人進士成化間任有傳

冷襲 膠州人監生

張雲鵬 睢州人舉人

王瀛洲 蒲州人舉人有傳

劉奎 寶峯人舉人

張廷舉 絳縣人舉人正德十二年任

曹雍 靈石人

劉世經

張偉 代州人舉人

梁朝用

方傑

鄭禮 河州人貢生嘉靖二十九年任

周紹大 四川人舉人

王汝 安陽人舉人

李承式 大同人進士嘉靖三十九年任有傳

王覲 歷城人舉人

方德茂 封邱人舉人弘治十六年任

葛濬 溧陽人監生

李文繡 遼東人舉人正德間任

閆濟 忻州人舉人

韓達 霑化人舉人嘉靖間任

杜應禎

吳治 嘉靖間任

王璣 鄆陵人舉人

李重

羅尙錦

劉東濬 朔州人貢士

侯祁 鞏城人進士

王希堯 安化人進士

王一夔 雲南人舉人

唐文學 福山人貢士

林獻芹 東莞人舉人

張公德 靈石人歲貢

賈燿 安陽人歲貢

李嘉會 聊城人歲貢

蔣學孔 全州人歲貢  
萬歷十七年任

衛三省 潼關人進士  
調邯鄲縣

孫淵如 濱州人舉人  
歷二十五年任

魯之賢 麻城人舉人  
傳有

汪學洙 弋陽人選貢

許都 潛江人進士  
傳有

程可登 高明人舉人  
啟問任有傳

俞昌言 仁和人舉人

李藏春 南陂人舉人  
人有傳

宋之范 陽城人隆慶間任

閻奉恩 邠州人舉人  
靖四十五年任

熊上林 祥符人舉人

畢綬 齊河人舉人

方元修 徽州人歲貢  
陞陝西延安府通判

侯鶴齡 河津人選貢  
萬歷癸未年任有傳

范希文 陽城人選貢  
陞東昌府通判

趙存豫 馬平人舉人

王家垣 清河人歲貢

陳來朝 河內人舉人  
萬歷間任有傳

汪垣 安陽人歲貢

張元 保德州人舉人  
天啓間任

李可觀 嵐縣人舉人

王啟允 定遠人選貢

余瓚 陽城人舉人  
人有傳

張斗 溫縣人 選貢有傳

周伯達 萊陽人 進士崇禎間任有傳

趙料 崇禎州人 舉人崇禎間任有傳

伍可教 濟甯人 歲貢

王俊民 韓城人 舉人

國朝

蘇萬姓 膠州人 歲貢

陳洪謨 遼東人 順治二年任陞登州府知府

周召南 遼東人 三年任陞青州府知府 歷任湖廣巡撫

李遇春 遼東人 五年任有傳

范時秀 遼東人 廕生 九年任有傳

渭符英 金壇人 進士十五年任有傳

董士貴 南海人 進士 康熙二年任

許來音 龍溪人 辛丑進士 八年任有傳

徐開錫 字定山 常山人 拔貢 十四年任

賀世封 字桐意 廬陵人 庚戌進士 十八年任有傳

湛鳳光 廣東增城人 舉人 二十年任



白 瑄 字獻白奉天人筆帖式二十一年任後陞黃州府同知

張聯芳 臨汾人歲貢二十三年任

陳奕禧 號香泉浙江海甯人貢監二十九年任有傳

吳彝銘 浙江山陰人歲貢三十四年任

李清鑰 號北門奉天人歲貢三十六年任有傳

蔣洪澍 字時若貴州貴筑人甲子舉人三十九年任有傳

陳雅琛 字喬山湖南益陽人庚辰進士四十八年任陞天津知州

戴大成 字晚亭廣東新會人甲子舉人五十一年任

劉 璋 字于堂山西陽曲人丙子舉人雍正元年任有傳

董五瑞 河南臨漳人歲貢五年任

劉元暉 福建永安人甲辰進士十七年任有傳

邱軒昂 廣東海陽人甲辰進士八年任

趙 憲 字無愆山東博山人庚戌進士十一年任

謝 杰 河南鞏縣人癸丑進士十三年任

李青選 字菴園福建上杭人丙辰進士乾隆九年任

康慶雲 江南懷寧人戊辰進士十四年任

蔣邦伯 字定侯湖南甯鄉人甲午舉人十六年任

吳國棟 字素存江西湖口人貢生十九年任

仲周霈 字資萬江南人舉人二十二年任

余瀛 江蘇儀徵人舉人二十九年任

許權 安徽歙縣人三十九年任陞滄州知州

孫萬備 山東甯海州人舉人四十九年任

李豎光 廣東嘉應州人舉人五十一年任

吳文鎬 江西德化人舉人五十三年任

周情 浙江山陰人五十四年任

鍾翰 江西上猶人舉人五十五年任

孫宗椿 湖南安鄉人舉人五十六年任

袁瑄 廣西平南人拔貢五十七年任調遷安縣

蕭泗水 河南滑縣人舉人嘉慶五年任

李震 山東鄒平人進士十一年任

金洙 山東歷城人由庶常改知縣十六年任陞易州知州歷陞天津兵備道有傳

呂鵬南 河南新安人貢生十八年任

何步衢 陝西南鄭人舉人十八年任

霍登龍 河南內黃人拔貢二十五年任陞涿州知州

于允中 山東昌樂人進士道光五年任

周榮鼎 舉人八年署任

宋豫芳 江蘇長洲人監生九年任

兆麟 滿洲正藍旗人筆帖式十四年任

吳步韓 字小岩山東鄒城人丙申進士十九年署任補望都縣

姜秉文 四川郫縣人進士二十年任

劉富春 江蘇人舉人二十一年署任

羅中庭 四川資陽人拔貢二十二年任

劉衡 字午峯湖南善化人舉人二十三年署任陞定州知州

王丕恩 山東海陽人舉人二十四年任

衛東陽 字曉園山西陽城人進士二十八年署任邑人立有德政碑

楊挺 字荔齋山西靈石人舉人二十八年任咸豐四年調補宣化縣

夏獻烈 江西新建人進士咸豐四年署任補無極縣

瑞恒 滿洲鑲白旗人舉人四年署任

夏子齡 字伯初江蘇江陰人丙申會元五年任六年調補饒陽縣

趙德滋 江西南豐人六年署任

胡桂芬 河南夏邑人七年署任

福興 字賓三滿洲鑲黃旗人戊戌進士七年署任

許忠 字葵生浙江仁和人七年任歷辦海運出力以知州用並加運同銜

張衍壽 字子靜庚子副榜山東海豐人十一年署任



縣丞

唐

齊賢 開元間任

元

元明思 至正間判縣有傳

明

馮處善 河南洛陽人

李潤 海州人

康寅 宜均人

牛宏 壽州人 成化十四年任

劉鑑 文登人

趙福榮 確山人

董熙 臨清人

張諒 澤州人

曾金 葭州人

張浚 許州人

楊杞 汝陽人

王鼎 山東人

楊縉 歸安人 成化間任

張本 四川人

成終始 曹州人

龍雨 福州人

王縉 泰康人

梁元禎 蒲州人

南樞 洪洞人

劉賓

孟巡宗 無錫人

張曰可 河南人

王琚 安東衛人

汪子清 歙縣人

令狐一峯 湖廣人 貢陞知縣

吳維州 江南人 員陞經史

馮之城 金壇人 生陞經監

許佐 六合人 選貢

萬歷四十二年奉裁

齋鸞

吳戀

王琛 遼東人

薛思忠 澤州人

楊億 溧陽人

吳源清 大同府人

孫可儒 遼東人 選貢陞知縣

周元善 鳳陽人 江西龍南人 歲知縣

蔣世芳 青州人 陝西清水人 選貢陞

主簿

唐

樊璆 開元間任

元

張翼 大德間任有傳

滑世昌 至順間任

明

阮午

王篤 平度人

霍葵 河內人

白璵 陝西人

邢璈 長青人成化間任

穆和 平度人

趙安 平陽人

韓慶 葭州人

王世真 至順間任

熊曇

李茂 陝西人

劉俊 高密人

張好學 鄒平人

張雷 山西人

楊玉 鈞州人

楊景 四川人



已後裁革

典史

唐

桑璉

張懷

張仲良 三人開元間尉

按丞齊賢簿樊璆尉張懷張仲良皆見大忍寺碑是時置官之多如此

元

李信 縣尉

田咬住 縣尉

李仲美 典史 三人俱至順間任

按楊州牧朗重修學記所載一時職官主簿二人尉二人尉之外又典史一人官制與今大異

明

張昭 徐溝人

李銘 忻州人

朱鼎 宿遷人

何正 長柯人

王嵩 山東人

王輔 黃縣人

鄭本乾 中江人

李華 汝甯人 咸化間任

李桐 淄川人

李經 徐溝人

陸芳 沐陽人

鄭儒 垣曲人

張舜臣

徐勝恭

凌德

張國興 紹興人

王士信 臨清人

熊良輅 南昌人

高萬策 山東人

郭桐 安寨人

郭本孝 宣城人

葉應祥 宿海人

張仕周 湖廣人

黃玉 汶上人

苗鳳 平定人

鄭杞 寧州人

王珩 山東人

李餘慶

徐廷楷

汪一寬

張希道 朝邑人

黎芳栴 陝西三原人

張養性 山東人 萬歷間任

趙維秀 霍邱人

徐國樞 新建人

甄錫恩 壽州人

楊應春 歷城人

張應浩 洛陽人

經仁篤 廣西人

程文衡 婺源人

李崇瑞 浙江人

趙尙寶 黃縣人

武光輝 陝西華陰人

魏國泰 陝西華州人

孫自遵 陝西富平人

周射斗 華陰人崇禎十六年任有傳

案明史彙循吏吳履傳內仁宣時州縣佐貳之知名者有深澤典史高聞志內未有觀此則佚而失載者亦多矣附識之

國朝

熊良輅 南昌人兩蒞深澤卒於官

陳應龍 紹興人順治三年陞廣東欽州巡檢

湯九成 山東掖縣人十六年任陞小直溝巡檢

王 峇 江南崑山人康熙十四年任

王 璣 山西洪洞人十八年任

蘇秉直 山東定陶人二十七年任

關起龍 河南寶豐人三十年任

章廷桂 浙江山陰人三十六年任

成美 山東齊東人 四十四年任

吳鎡 浙江山陰人 五十四年任

王生瑞 江南吳縣人 雍正二年任

洪敬宇 江南旌德人 六年任

陳廷鑑 浙江會稽人 乾隆三年任

劉紹統 江西廬陵人 監生 十七年任

李維銓 山東長山人 二十八年任

鄭永滋 安徽旌德人 三十年任

陶兆麟 浙江紹興人 三十三年任

李維銓 四十年復任

劉應科 奉天承德人 四十六年任

高元輔 安徽貴池人 四十八年任

周履衢 貴州畢節人 拔貢 五十三年任

潘慶凱 浙江錢塘人 五十七年任

唐大來 浙江山陰人 五十九年任

李經 四川華陽人嘉慶二十三年任

衷謙 江西南昌人二十五年任因公  
撤任士民保留未準卒於深澤

顧立元 江蘇吳縣人道光九年任

陳懋崧 浙江山陰人十年任

茹元錫 承德人十四年任

王錫晉 陝西商州人十八年任

朱以徵 浙江歸安人二十二年任陞巡檢

李懷庚 山西孟縣人二十六年任

馮允中 浙江山陰人二十六年任

景嘉楷 浙江會稽人三十年任

杜承懋 浙江山陰人咸豐元年任

胡振銓 安徽婺源人二年任

王從酉 湖北漢陽人三年任

翁藩城 湖南湘潭人四年任陞江西南安府經歷

孔憲階 山東曲阜人六年任

衛銘桂 山西鳳台人七年任

教諭

明

張鳳 徽州人舉人

梁瑞 武城人舉人

張湜 慈谿人舉人

李軌

都昂

李良玉 雲南人舉人  
宏治間任

丁進 武陽人

張宗彝 山西人舉人

陳應龍 新昌人

秦邦本 桂林人舉人

秦文學 山西人

朱永壽 高唐人

張望卿 諸城人

魏瓊 魏縣人

劉忠 葉縣人

龐克 中山人舉人

韓政 成化間任

傅英 餘姚人舉人  
宏治間任

黃紳 洧州人

顧純 鳳陽人舉人

任廣 霍州人

黃文欽 四川人

金國順 湖廣人

宋九霄 德州人

宋世科 德州人

任世鰲 永壽人舉人



石廷柱 涿州人

王家相 平鄉人

孟昊 上黨人舉人

邢偉 吳橋人

姚守松 永寧人

李躍龍 正定人

郭鳴秋 永清人

郭躋 大名

周邦泰 任邱人

韓公燮 順天人舉人陸  
邠州知州

國朝

曹岐鳳 昌平人

張勸 順天人舉人

康熙四年奉裁十五年復設

沈雲龍 鑲藍旗舉人康熙十六年任

王三聘 藁城人舉人

陳堯夫 淮安人舉人

楊慎家 涿州人舉人  
陸靈寶知縣

甘維孝 濱陽人舉人

余霽 雲南人

盧鼎 永平人歲貢  
陸學正

趙昺 平湖人舉人  
天啟間任

趙宋儒 平湖人舉人

傅詔 商城人舉人天啟  
間任陸東平知州

趙鏜 南和人

崔可徵 南皮人

王家尹 唐山人

龐爾熙 天津舉人二十五年任

賀渭源 大興人歲貢三十四年任陞海寧知縣

劉溥 大興人歲貢三十九年任

芮而發 寶坻人歲貢四十二年任

姚文昭 宜化人五十一年任

杜永滋 廣平清河人拔貢五十六年任

張淑祺 正定人舉人雍正五年任

龔巖 盧龍人舉人乾隆六年任

張升業 遵化人拔貢十五年任

鄭宏毅 奉天承德人拔貢十九年任

楊文淵 寶坻人廩貢二十四年任

王灝 固安人副貢二十九年任

劉竄 正定人拔貢四十一年任

賈翰 任邱人舉人五十四年任

劉振聲 阜平人廩貢嘉慶三年任

郭城 撫寧人舉人四年任

李文煥 遷安人舉人十八年任

劉紹基 審津人舉人道光二年任截取知縣選山東利津縣

李昌第 遷安人舉人十六年任

周之翰 天津人貢生二十三年任中丙午科舉人

楊檀 審河人副貢二十五年任

教其相 永年人舉人咸豐五年署任

續曾 漢軍鑲黃旗人舉人五年任辦海運保舉以知縣即選

劉汝霖 景州人舉人十一年任

訓導

明

汪則清

張林 江西人

王聰 陝西人

張讓 齊東人

袁登 新塗人

夏子方 日照人

于寬 安陽人

楊聰 蒲臺人 成化間任

江深 歷城人

楊甯 濟寧人

張釗

張鼎 掖縣人

劉譽 光州人

趙琰 高唐人

李翰 固始人

倪端 汝陽人

李珣 祥符人

吳儼 樂平人 舉人

潘漢 仁和人

周清 武陵人 成化間任

吉旺 濟寧人 舉人

王暄 泰安人 舉人

陳良弼

胡海 臨安人 舉人

董澤 嵩縣人

劉汝為 山東人

張敏 曲阜人

黃宣 歙縣人

裴良臣 夏縣人

師孟 歷城人

劉銳 扶溝人

史憲 河南人

韓荊 沂州人

吳文光 江西人

許齡 泌陽人

王都 濰城人

馮泮 保定人

劉行可 濰州人

張熙 懷柔人

郭應登 河間人

馬三德 青縣人

張宗彝 營山人

郝雲潮 沂縣人

李顯 高唐人

張樞 歸德人

張引縉 新安人

高仕 霍州人

賀鳳岐

王卜問 平陸人

蘭璧 靈寶人

陳霖 臨武人

姚崇孝 沙河人

陳光閻 鞏晉人

張懷仁 永清人

王守泰 順德人

于應聘 井陘人

曹化中 遼東人

周汝基 河間人

曾可毅 昌黎人 崇禎間任有傳

按明初教諭一人訓導二人後乃裁其一故深澤學教諭僅四十五人訓導至五十人而李東陽修學記所載周清楊聰一時同為司訓

國朝

魏維聰 南樂人

王思牧 固安人

顏永華 永清人

趙拱樞 寶坻人

順治十六年奉裁康熙四年復設

郭化麟 慶雲人 陞河南開封縣丞

劉汝升 字振之 涿州人 歲貢有傳

呂起礪 滄州人 歲貢康熙二十一年任

金榜 薊州人 二十五年任

張宗孔 盧龍人 二十七年任

高彌高 樂亭人 歲貢二十三年任

董鈞 甯晉人 歲貢四十三年任

孫士杰 遵化人 歲貢五十年任

劉宸綽 正定人 歲貢五十二年任

李雲聲 元氏人 歲貢雍正三年任

王迪修 內邱人 歲貢七年任

袁之屏 曲州人 歲貢九年任

劉業仁 承德人 歲貢乾隆二年任

錢鋸 南宮人 歲貢十年任

李珮 漢軍 護白旗人 歲貢十七年任

段璋 清河人 歲貢二十一年任

郝本厚 霸州人 歲貢二十四年任

陳兆麟 密雲人 歲貢二十九年任

李文熙 任邱人 舉人三十三年任

王良楫 大興人 舉人五十二年任

李三善 高陽人舉人五十三年任

齊安宇 獻縣人貢生五十五年任

汪曾頌 灤州人貢生嘉慶八年任

趙倫 密雲人貢生十三年任

樊文謨 文安人舉人十六年任

張建猷 武強人貢生二十一年任

李鑠 漢軍鑲紅旗人拔貢道光七年任後  
成進士任山東鄒平縣知縣

趙基復 新城人舉人十三年任

王九如 南宮人舉人十四年任

梁誌 蠡縣人舉人咸豐元年任

王存仁 東安人舉人二年任

孫慶瀾 天津人舉人八年由高邑縣訓導調任





小章汎千總

李繩武 清苑人行伍

王鵬勝 山西人武舉

李修業 清苑人

以上均乾隆間任據東鹿縣志增入

周廷獻 四川人軍功嘉慶間任

李景江 道光十九年任

道光二十二年奉文改為把總

閻大本 清苑人道光二十三年任

張澍 清苑人咸豐七年署任

張得祿 清苑人行伍

那丹珠 滿洲正黃旗人

胡立本 清苑人武舉

張連元 保定人道光初年任

孫德亮 保定人咸豐三年任

李鎮 清苑人咸豐九年任



名宦

唐

劉遂昌開元間尹好寬大之德行和平之政民化其醇莫不服從而愛戴之

見大忍寺碑

宋

許安石元祐中爲深澤令時廟學久廢特于城東北隅擇地修建以振起斯文爲已任民感其化莫不爭自奮興元豐間溥沱漲溢水灌城幾危安石治之有方城賴以全

見廟學碑

金

劉仲洙字師魯宛平人大定三年進士任深澤令縣近溥沱河秋暴溢仲洙極力護塞禾稼竟無害有盜夜發居民震驚仲洙馳往執其一餘衆潰且曰掩捕皆獲尋以廉能進官一階入爲吏部員外郎世宗謂宰臣曰人有言語敏辨而庸常不正者有言語拙訥而才智通達存心向正者如劉仲洙頗以才行見稱然而口語甚訥也右丞張汝霖曰人之若是者多矣願陛下深察之後出爲邠州刺史累遷定海軍節度使泰和八年卒仲洙性剛直果于從政尤長于治民故所在皆有功蹟云

節錄金史本傳

明

王源字啟澤龍巖人永樂二年進士授庶吉士十四年來知縣事首修學舍值河水溢築大橫等四隄以禦水患勸民及時嫁娶時民俗偷薄因事戒諭俗爲之變數上書論事被詔徵入都又論時政得失忤旨下吏會赦復官奏免逋賦歲飢輒發粟賑救坐是被逮民爭先輸納得贖還召爲春坊司直郎累遷潮州知府嘗建亭設先聖先賢像刻呂氏鄉約與民講肆其中西湖山上有大石爲怪源命鑿之果獲石骷髏怪遂息乃琢爲碑大書潮州知府王源除怪石河東山有韓愈祠陳獻章有言吏于潮者多矣其有功于民而思之者前惟韓愈後則王源云 節錄明史稿

梁驥字尙德咸甯人由監生任縣丞成化間陞澤令出納明慎經畫有術施爲有序招流亡去豪暴凡城隍壇壝倉庾隄堰及養濟院申明亭釐餉創始皆有成績而修葺

廟學尤其所重實惠及人

見廟學記

王瀛洲蒲州人以舉人令澤嘗謂先儒有言一命之士苟存心利物于人必有所濟因誓詞自勵凡政之宜民者次第施行去後民不忍忘

侯鶴齡山西河津人萬歷間由選貢令澤在任四年多所興革尤加意學校陞山東沂州知州去之日民遮道感泣

魯之賢麻城人由舉人令澤敏于聽訟決斷如流時人號爲魯青天臺使皆廉其能考

最特表爲二十城之冠尋擢貴州道御史

陳來朝河內人萬歷間由舉人令澤承魯之賢任後凡前令所已試者遵守之其未行者則銳意興革性寬仁聽訟惟以善言勸導終歲不事鞭朴凡學宮書院城池倉廩無不因時修補又創立養濟院每冬置大被數襲火坑數處以待無告窮民並置漏澤園恩及枯骨抑強扶弱崇儉緇奢差徭之累民者革除殆盡在任五年民戴如父母陞鞏昌府同知民爲建祠立碑

楊焯山西岢嵐州人舉人善談飲工翰墨性和易近人及

大清兵至城將陷人皆勸其走避焯神色不變曰守死吾分也去將何之城破遂死之時

崇禎十六年三月十二日也

以上康熙志

曾可毅昌黎人崇禎間爲深澤訓導賦性剛方人不敢干以私與諸生講論經史終日不倦

大清兵至死之

周射斗華陰人崇禎間爲深澤典史

大清兵至竭力守禦城破巷戰而死

以上補纂

國朝

符渭英字非熊金壇人順治十五年由進士令澤性恢諧而才倜儻時水旱之後流亡頗多渭英招徠撫綏民業漸復抑勢豪培學校恩威並用當鼎革時東固羅村民王成宇所爲多不法渭英廉其奸狀以計斃之獄奸猾斂戢在任五年民親之如父母

陞大理寺評事 康熙志

許來音號仁峯龍溪人辛丑進士康熙己酉冬來宰澤時盜賊橫行民不安枕來音曰內寇不靖何緝外寇爲乃嚴清保甲廉訪有案積匪民所切齒者或于集市矚目之地立斃之仍勅鄉民守禦布置如法一方告警羣鄉救援嚮應捷于羽檄盜遂屏迹奸民李學進等謀殺王文舉翻陷諸生祝昌齡暨子祝苞來音虛公訊鞫脫昌齡等于獄邑有狐皮賦久爲民累上請得改折先是邑童子試額取六名來音援例力請得增其二暇則召諸生于庭課其殿最貧乏者優恤之士賴以舉火者數十家百歲翁郭邦山者農叟也來音降心敦請禮遇如上賓時廩餼之曰庶使吾民知老也時邑乘久失加意搜輯編纂三閱月而書成一邑文獻實權輿于此蒞澤六載實政實心百廢具舉寬嚴並用民皆畏而懷之尋陞內閣中書康熙四十一年入祀名宦

祠節錄王瑛所作本傳

蔣洪澍字商霖貴筑人甲子舉人康熙三十九年令澤儉約自守淡泊若寒素士治官

書則至夜分不倦每朔望躬詣明倫堂宣解 聖諭多方勸勉吏民皆竦聽暇則嚴查保甲別良莠勤守望以補教化所不及一時民安盜息催科不擾稱樂土焉永定河衝決檄各縣採買椿木株以萬計民惶恐洪澍極力懇請僅輸其半邑西北當木道溝之衝歲苦水患乃濬治之使水有所歸其築城池修文廟尤不惜捐重貲爲經久計上官知其能檄委治大城縣堤工在水中猝未易辦人咸畏之洪澍慨然曰主事也何憚勞乎會暴風水涸堤工刻期竣上官爲之色動紀名錄其功加意學校修義館擇師訓課人文蔚起一時若王植宋鋒等皆其所識拔任八年陞戶部主事旋出守湖州府以積勞成疾卒卒之日僚屬入視見其宦篋蕭然咸喟然出涕澤人於其去也既祀之六賢祠而湖人亦公請入祀湖郡名宦祠

節錄王宗洛所作傳本以上乾隆志

### 宦蹟

宋

張克敬崇甯人以山東道節推來知縣事重修廟學見吏事剴毅然振作在任數載政聲顯著 按舊志本作克昌考修學記有克敬疑昌即敬之訛學記克敬下註云宗甯人疑宗又崇之訛也

元



張翼字飛卿欒城人大德間任深澤主簿爲政以德不以刑有事役民以身率之民皆畏服而懷其德去後爲立碑以紀其績

毛景謙至順二年由翰林院編修尹深澤性廉正遇事明決訟者立得其情在任摧豪破奸尤加意學校以培植人才爲先務吏民信悅立石頌之

崔讓字謙甫至正間知深澤性寬仁不事刑威專以德感人興利除害崇儉抑奢三年風俗不變民懷其惠

元思明隆平人至正間判深澤持身廉潔爲政寬猛並濟尤愛獎禮賢士卓然有古循吏風

岳難公烏孫人爲深澤達魯花赤以廉潔自矢而才能幹濟邑事無不舉于養士勸農尤汲汲焉未幾一邑大治以上五人皆節錄去思碑

明

高文瀏陽人正統間任由主簿晉縣丞陞縣令三任皆在澤洞悉民情訟無大小立爲申理蒞澤共九年德惠及人去思不替

李承式大同人進士嘉靖三十九年令澤勤慎有爲暇則修廟學進諸生訓課之獲其容接者皆自勵時嘉靖末年工役繁興民不勝憊植派車牛載黃木承式力請上官

請上官得輕減歲庚申大旱蝗食禾稼殆盡乃勸士民出粟以賑飢民得免流離以  
北城空闕創建北極廟以壯形勝後累官福建左布政使初承式在澤生子植即以  
深澤爲小字延邑人張順治教之後成進士官至遼東巡撫節錄去思碑

許都潛江人由進士令澤性慈仁有局度民依之如父母歷二載調寶坻尋陞戶部主  
事

程可登廣東高明人天啟間由舉人令澤勤于政事多所興革去後有碑勒其績

李藏春湖廣黃陂人由舉人令澤勤而慎著有治澤政略其自識曰澤川腴小而凋敝  
如積痼羸人聞風欲僵診視者不調燮其元氣而攻以烏毒旋且仆矣自知非醫國  
手又慮庸術殺人自貽伊戚謹留病以還主人而不敢取刀圭之効以博能譽遷延  
及三紀雖主人之病未盡瘳而亦不大痿或則撫摩拊循之微方也昔仲康默默以  
爲理鄰郡嗤其不能得仁恕使者行阡陌而始辨之今無下覘者惟持此血心以告  
衾影云爾任三年陞南雄府同知

于瓚山西陽城人由舉人令澤廉介不苟清約自持與民休息而民自安遷兩淮鹽運  
副使

張斗河南溫縣人由選貢令澤精數學掌觀天文知盜賊將蜂起留意城守事每拊髀

欽日數年後當苦兵此邑彈丸脫羣盜剽掠何以自衛乎擇丁壯四百有奇免其役朝夕訓之號日凱兵未幾盜作凱兵能擒盜于他邑一方倚爲保障陞永平同知晉僉事

周伯達字二如萊陽人進士崇禎十二年令澤丰神俊偉涖民如神會有兵事介胄登陴晝夜無倦容未幾調河間縣累官至蘇松巡撫御史

### 國朝

李遇春字載陽遼東人順治初年令澤時方定鼎數有兵過境民恐遭掠多避匿遇春單騎白主帥請軍行悉按部伍且引婦女避公廨中而親導諸兵西去軍伍帖然及逾無極疆帥問何縣遇春曰吾縣也無極民亦免及還無極民叩頭呼父母云蒞任四年陞山西苛嵐州牧

范時秀字實甫遼東人順治九年以陰生令澤爲政不尙煩苛御胥吏以嚴待百姓以寬時羣盜尙未斂迹時秀畜家丁簡鄉壯朝夕訓練名小范營盜至悉擒之境賴以安值澮水泛漲衝城勢甚危乃築分水龍王廟于西城臺以禦之城獲全任六年陞南安府知府復陞廬鳳道

以上均康熙志

劉汝升字振之涿州人由歲貢任深澤訓導舉止端方言笑不苟日誨課諸生娓娓無

倦容觀者咸歛肅額徵學田租視諸生貧乏者賑之不遺餘力學宮少傾圮即捐俸修葺而冷然青氈自甘澹泊惟以琴書自樂他無與焉

賀世封字桐意廬陵人庚戌進士康熙十八年令澤性慷慨直質爲政不尚文飾下車日以清勤自誓凡陋規雜派革除殆盡歲少歉即竭力捐賑尤以栽培人才爲首務每課試日談談快論藹然家人父子情若不知有勢分者重修名宦祠增置尊經閣皆實力倡捐以竣厥事初椽吏未知有上進階始勸令試吏嗣屢有獲仕者未三載以逃人案解組邑人爲立去思碑

以上乾隆志

陳奕禧字子文海寧人工翰墨康熙間令澤清慎愛民尤以整飭書院爲務初興化寺左有泉味甘而冽奕禧訪得之作香泉記建亭其上泐以詩曰暢詠其中因自號曰香泉後陞戶部郎中以善書入侍

南書房歷任石阡南安二府知府

李清鑰字北門奉天人工書法蒞澤後整飭庶務惟恐不逮後陞太原府知府有寶賢堂法帖行世

陳雅琛字喬山湖南益陽人庚辰進士康熙四十八年令澤寓撫字于催科化強梁爲善類良法美政志在行其所學創立書院于官廨西名之日喬山書院公餘輒至雖

童子一藝必手爲丹鉛亦時搆一藝以相質日久積成一秩名之曰鼓城小草蓋取益人神志且示謙也士經其造就者指不勝屈任三載陞天津知州

以上補纂

劉璋陽曲人舉人年及髦始受澤令諳于世情于事之累民者悉除之邑自壬寅歲洊飢數有盜嘗一夜數譁璋立捕盜法獲一盜予十金盜多就獲輕者責令緝盜自贖其情重者剖長木穿孔入夜錮其一足雖轉側而卒不得脫其制嚴而不猛類如此欲民不終訟村置鄉平一人遴老成謹厚者爲之小事令鄉平勸諭訟多中止其斷獄則虛公研訊嘗有被盜誣陷者前令時獄已具人冤之璋爲獲真盜得雪有命案實縊似勒業以勒上申矣旋察其實即自檢舉任四載民愛之如父母旋以前令虧米穀累解組

劉元暉永安人進士歲己酉蒞澤初下車問舊政知劉璋賢曰官不以升黜爲優絀前劉吾師也兄事之每與紳士接問民情問土俗問政之得失勤勤懇懇惟恐不得當有訟者曲直既判不事敲朴常以國法天理人情反覆開示使曲者皆自知其罪將退猶誠曰勿復爾法不可數干也其催科力行滾單法初邑多戶胥里書飛灑包收諸弊元暉深究其由乃多爲催單令人少而易徧糧少而易完單未出預完者免催單既發先完者改單民爭輸日到門改單者如市雖終日勞弗恤也僅一歲亦以事

解紀時劉璋尙未得歸也邑士民時時供其薪水稱之曰山西劉公福建劉公云

節錄王植所作二劉公傳以上乾隆志

金洙字文波歷城人由庶吉士改官知縣初蒞澤年方二十餘人以其少也易視之既而廉明慈惠胥吏皆欽服勿敢欺時有邑紳叔欺其孤姪者屢控官訟不已洙廉得其實謂紳曰汝等乃骨肉勿復爾如再控吾必從公論斷不汝徇也紳卒爲斂戢後陞易州知州累官至天津兵備道入祀易州名宦祠

續纂